

# అపొస్తలుడు ఆతి పవులు కొరింతి పట్టుమ్దు మని నమ్మితి వరి సజమ్దిజ్ రాస్తి మొదొహి ఉత్తం

నెల్వ కిబిసినిక

ఇక్క అపొస్తలుడు ఆతి పవులు కొరింతి పట్టుమ్దు మన్ని దేవుణు సజమ్దిజ్ రాస్తి మొదొహి ఉత్తం. పవులునె ఇక్క రాస్తికాన్ ఇజి యా ఉత్తమ్నె రుజుప్ సీజినాద్. 1:1,16,21. దేవుణు సజమ్దు మన్ని విజు సజతిజ్ వందిజ్, నమ్మితి వరి నడిమి మన్ని గొడబెజ్ వందిజ్, దేవుణుదిజ్ పొగ్డిజి మాడిన్ని వందిజ్, దేవుణు పణి వందిజ్ సీని వందిజ్, నమ్మితికార్ జటు ఆజిని వందిజ్, సజమ్దు మన్ని బోదెక్ ఎలాగ మండ్రెజ్ ప్రబు ఏర్పాటు కిత్తి బోజనం వందిజ్, పెండ్లి వందిజ్, మరి యాలెకెండ్ మన్ని నండో సజతిజ్ వందిజ్ ఎలాగ కిదెజ్ ఇజి యా ఉత్తమ్దాన్ పవులు కొరింతి సజమ్ది వరిజ్ వెస్సినాన్. యా ఉత్తమ్దు రాస్తిమన్ని సజతిజు వందిజ్ సుడెతిజు అయా కాలమ్దు మని సజమ్దిజ్నె ఆవిండ యా కాలమ్దు మన్ని సజమ్కాజ్బా యాక ముకెలమాతి ఉండ్రె ఉత్తం. అక్కడె ఆవిండ నమ్మితి వన్నిజ్ మన్ని ప్రేమ వందిజ్, సాత్తికార్ మర్జి నిజ్ని వందిజ్ రాస్తి సజతిజ్ ఎలాకాలమ్దు మన్ని నమ్మితి వరి వందిజ్ రాస్తిక్కాదె. యా ఉత్తం యేసుక్రీస్తు సాజి మర్జి నిజితి వనుక యాబ్బయ్ ఏడునో యాబ్బయ్ ఆరునో పంటెజ్ వెనుక రాసె ఆత్త మనాద్ ఇజి విజేరె నమ్మిజినార్. పవులుని వన్ని జటుదికార్ వారు రుండి సుట్టు. సువార్త సాటిస్తెజ్ సొన్ని మహివలె (A.D. 50) కొరింతి పట్టుమ్దు అందితార్. డగ్రు 18 నెల్లెజ్ మంజి సువార్త పణి కిజి మహిజ్ బాన్ దేవుణు సజం తయారాతాద్. (అపొస్తరు కిత్తి పణిజ్ 18:1-8). పవులు ఎపెసు పట్టుమ్దు మహివలె, బాణిజ్ యా ఉత్తం రాస్తపోక్తాన్. యా ఉత్తం

నెగెండ్ సద్వీజి నెసి మహిజ దేవుణు సజం ఎలాగ మండ్రెజ్ ఇజి సజమదిజ్ నడిపిసిని వరిజ్, నమ్మితి వరిజ్ నెగెండ్ అర్థమానాద్.

మొదొల్

<sup>1</sup> దేవుణు ఇస్థమాతి వజ, క్రీస్తుయేసుజ్ అప్పొస్తుడు లెకెండ్, వాండ్రు కూక్తి మని పవులు ఇని నాను కొరింతి పట్టుమ్దు మని దేవుణు సజమదిజ్ రాసిని ఉత్తం. మా తంబెరి ఆతి సొస్తెనెసు నా వెట మనాన్.

<sup>2</sup> మీరు లోకమ్దు విజుబాన్ మని వరిజ్ని మజి ప్రబు ఆతి యేసుక్రీస్తు పేరు అసి పొగ్డిజి మాడిసిని వరి వెట మీరుబా కూడ్డి మంజినిదెర్. అందెజె మీరు ప్రబు ఆతి యేసుక్రీస్తు వేట కూడిజి దేవుణు వందిజ్ కేట ఆతికిదెర్ని దేవుణుదిజ్ సెందితికిదెర్ ఆజి మండ్రెజ్ ఇజి కూకె ఆతి మనిదెర్.

<sup>3</sup> మా బుబ్బాతి దేవుణుని ప్రబు ఆతి యేసు క్రీస్తు దయా దర్మమ్దాన్ మీరు నిపాతి మండ్రెజ్ సాయం కిపిన్.

<sup>4</sup> క్రీస్తుయేసుదాన్ మిజి దేవుణు సతిమని వన్ని దయా దర్మం వందిజ్ నాను ఎస్తివలెబా మీ వందిజ్ దేవుణుదిజ్ వందనమ్కు వెప్పొన.

<sup>5</sup> అహిజ, మీరు విజు సజతిజ వందిజ్, ఇహిజ, మీరు వర్గిజిని విజు మాటెజ లొఇ, మిజి మని గెణమ్దు, క్రీస్తు వెట మని సంమదమ్దు మీరు దేవుణు సీజిని మేలుజ్ విజు కలితి మని కిదెర్ ఆజినిదెర్.

<sup>6</sup> ఎందనిజ్ ఇహిజ క్రీస్తు వందిజ్ మాపు వెప్తి మని సాస్యం వందిజ్ ఇని అనుమానమ్బా సిల్లెండ మీ మన్నుజ మీరు గటిజ గుర్తు అస్తిదెర్.

<sup>7</sup> అందెజె, దేవుణు ఆత్మ సీజిని వరమ్కాజ్ లొఇ ఇని దనిజ్బా తకు సిల్లెండ, మా ప్రబు ఆతి యేసు క్రీస్తు తొరె అని దినం వందిజ్ గొప్ప ఆసదాన్ ఎద్దు నుడెజి మంజినిదెర్.

<sup>8</sup> మా ప్రబు ఆతి క్రీస్తు యేసు తీర్పు సీని దినమ్దు మీరు ఇని తప్ప సిలెండ మనికిదెర్ ఇజి తొరె అదెజ్ దేవుణు మిజి సత్తు సీజి ఆకార్దాక కాప్ కినాన్లె.

9 వన్ని మరిన్ ఆతి, మా ప్రబువాతి యేసుక్రీస్తు వెట కూడిజి మండ్రెజ్ మిజి కూక్తి మని దేవుణు నమ్మిదెజ్ తగ్గివాన్.

**దేవుణు సజమ్దు నమ్మిత్తికార్ కేట ఆజిని వందిజ్**

10 తంబెరిజాండె, అందెజె మీ లొణ ఇని కేట ఆవండ మండ్రెజ్ ఇజి, మీరు విజిదెరె, ఒరెన్ మరి ఒరెన్ వెట ఉండ్రె మన్ను ఆజి మండ్రెజ్. మరి మీరు విజిదెరె ఒండెబినిబాన్, మీ మన్నుదు పూర్తి ఉండ్రె ఆజి మండ్రెజ్ ఇజి మా ప్రబు ఆతి యేసుక్రీస్తు బాణిజ్ నజి దొహ్క్తి అతికారమ్దాన్ నాను మిజి బతిమాల్లిన.

11 ఎందనిజ్ ఇహిజ మా తంబెరిజాండె, మీ లొణ గొడెబెజ్ మన్నె ఇజి క్లోయె ఇండ్రెణికార్ సెగొండార్ నజి కబ్బు తత మనార్.

12 నాను వెహ్పినిక ఇనిక ఇహిజ, ఒరెన్, “నాను పవులుజ్ సెందితికాన్”, ఇజినాన్గె, మరి ఒరెన్, “నాను అపొలుజ్ సెందితికాన్”, ఇజినాన్గె. మరి ఒరెన్, “నాను కేపెజ్ సెందితికాన్”, ఇజినాన్గె, మరి ఒరెన్, “నాను క్రీస్తుజ్ సేందితికాన్”, ఇజి వెహె ఆజినిదెర్గె.

13 క్రీస్తు ఎయెర్ వందిజ్బా బాటెజ్ ఆవతాన్. పవులు ఇని నాను మీ వందిజ్ సిలువాదు సావత. మీరు పవులు ఇని నా పేరుదాన్ బాప్తిసం లాగె ఆజితిదెర్.

14 క్రీస్తునుని గాయియుకు, వారు రిఎర్ ఆవండ మరి ఎయెరిజ్బా నాను బాప్తిసం సివత. దన్ని వందిజ్ నాను దేవుణుదిజ్ వందనమ్కు వెహ్పిన.

15 అందెజె నా పేరుదాన్ మీరు బాప్తిసం లాగె ఆతిదెర్ ఇజి వెహ్పెజ్ ఎయెరిజ్బా అక్కు సిల్లెద్.

16 స్తేపాను ఇండ్రెణి వరిజ్బా నాను బాప్తిసం సితమన. అక్కాదె ఆవండ మరి ఎయెరిజ్బా బాప్తిసం సత్తిక నజి ఎత్తు సిల్లెద్.

17 ఎందనిజ్ ఇహిజ, సువార్త వెహ్పెజ్నె క్రీస్తు నజి పొక్తాన్. గాని బాప్తిసం సీదెజ్ ఇజి నజి పొక్ఎతాన్. అందెజె క్రీస్తు సిలువాదు సాతి సావుది సత్తు తకు ఆదెజ్ ఆవద్ ఇజి నాను సువార్త సాటిస్సిక యా లోకమ్ది లోకురి గెణమ్దాన్ కూడితి మాటెజాణిజ్ ఆవద్.

### దేవుణు గెణమ్ని సత్తు ఆతిమన్ని క్రీస్తు

18 నాననమాజి సొని వరిజ్ క్రీస్తు సిలువాదు సాతి వందిజ్ వెప్పిని సువార్త బుద్ది సిల్లి పణి కిత్తి వందిజ్ వెప్పిని మాటెజ్ లెకెండ్ తోరిజినె గాని దేవుణు రక్కిస్తి మని మజి యాక దేవుణు సత్తు.

19 అందెజె, “వారు గెణం మనికార్గె! వరి గెణం నాను పాడెకినాలె. వారు బుద్ది మనికార్గె! వరి బుద్ది నాను పణిదిజ్ రెండె కినాలె”, ఇజి దేవుణు మాటదు రాస్త మనాద్.

20 బుద్ది మన్నికాన్ ఇజి ఒడిబితి మని వన్ని బుద్ది ఇనిక ఆత మనాద్? గొప్ప సదువు మనికాన్ ఇజి ఒడిబితి మని వన్ని సదువు ఇనిక ఆత మనాద్? యా లోకమ్ది పండిత్ ఇజి ఒడిబితి మనికాన్ ఇనిక ఆత మనాన్? యా లోకమ్ది విజు గెణం దేవుణు బుద్ది సిలి పణి లెకెండ్ పణిదిజ్ రెఇ లెకెండ్ కిఎతాండ్రా?

21 దేవుణు సితి గెణమ్దాన్, లోకమ్దిజ్ సెందితి వరిజ్, వరి గెణమ్దాన్ దేవుణుదిజ్ నెస్తెజ్ అట్ఎండ మహిజ్, లోకమ్దిజ్ సెందితి వరిజ్ బుద్ది సిల్లి పణి ఇజి తోరె ఆతి సువార్త సాటిసి, నమ్మిజిని వరిజ్ రక్కిస్తిజ్ దేవుణు ఇస్తం ఆతాన్.

22 యూదురు ఆతికార్ బమ్మాతి పణిజ్ కొరిజినార్. గ్రీసు దేసెమ్దికార్ గెణమ్దిజ్ రెబాజినార్.

23 గాని మాపు క్రీస్తు మా పాపమ్క వందిజ్ సిలువాదు సాతి సావు వందిజ్ సువార్త సాటిసినావ్. ఇక్క యూదురిజ్ అడ్డు లెకెండ్ తోరిజినె. మరి యూదురు ఆఇ వరిజ్ బుద్ది సిలి పణి లెకెండ్ తోరిజినె.

24 గాని యూదురిజ్ని యూదురు ఆఇ వరిజ్, అహిజ రక్కిస్తిజ్ ఇజి దేవుణు కూక్తి మని విజెరిజ్, క్రీస్తు, దేవుణు సత్తు ఆత మనాన్. క్రీస్తు, దేవుణు గెణం ఆత మనాన్.

25 ఎందనిజ్ ఇహిజ, దేవుణు బుద్ది సిలి పణి ఇజి లోకుర్ ఒడిబినిక లోకురి బుద్దిదిజ్ ఇంక బుద్ది మనిక. దేవుణు సత్తు సిల్లి పణి ఇజి లోకుర్ ఒడిబినిక లోకురి సత్తుదిజ్ ఇంక బలం మనిక.

26 తంబెరిజాండె, దేవుణు మిజి కూక్తి మహివలె మీరు ఎలాగ కూకె ఆతి మనిదెర్ ఇజి ఒడిబిదు. లోకమ్దు మన్నికార్ ఒడిబిని లెకెండ్

ఇహిజ, మీ లోక బుద్ధి మనికార్ లావు నండొండార్ సిల్లెర్, గొప్ప వారు లావు నండొండార్ సిల్లెర్, పెరి కుటుమ్దికార్ లావు నండొండార్ సిల్లెర్.

27 వారు బుద్ధి సిలికార్గె! గాని లోకమ్దు మని బుద్ధిమని వరిజ్ సిగు కిదెజ్, దేవుణు బుద్ధి సిలి వన్కాజ్ ఎర్లిస్తాన్. వారు సత్తు సిలికార్గె! గాని లోకమ్దు మని సత్తుమని వరిజ్ సిగు కిదెజ్ దేవుణు సత్తు సిలివనకాజ్ ఎర్లిస్తాన్.

28 యా లోకమ్దు ఇనికాదొ ఆతిమని వన్కాజ్, అక్కెజ్ ఇనికెజ్ అజ ఇజి తొరిస్తెజ్ ఇజి ఏకం అడిగి మని వనకాజ్ని ఇస్తం కిజ వన్కాజ్, ఇనికబా అజ వన్కాజ్ దేవుణు ఎర్లిస్తాన్.

29 అందెజె ఎయెన్బా దేవుణు ఎర్దు ఇనిదని వందిజ్బా పొగ్డెః ఆదెజ్ ఆట్ఎన్.

30 వన్ని వెటనె మీరు మా వందిజ్ దేవుణు బాణిజ్ వాతి మని గెణమాతి మన్ని క్రిస్తుయేసు వెట కూడిజి మంజినిదెర్. అహిజ, వన్ని వెటనె మాటు నీతి నిజాయితి మనికాట్ ఆతాట్, దేవుణు వందిజ్ కేట ఆతికాట్ ఆతాట్, విడుఃదల పొందితికాట్ ఆతాట్.

31 అందెజె దేవుణు మాటదు రాస్తి మని లెకెండ. “పొగ్డెః అనికాన్ ప్రుమ కిత్తి వన్కా వందిజ్ పొగ్డెః ఆదెజ్ వలె”.

## 2

1 తంబెరిజాండె దేవుణు వందిజ్ సాస్యం మీ నడఃమి సాటిస్తెజ్ ఇజి మీ డగ్గు నాను వాతివలె నెగెండ వర్గిదెజ్ అట్టి వన్ని లెకెండనో, గొప్ప పెరి బుద్ధి మని వన్ని లెకెండనో మీ డగ్గు రెవత.

2 అందెజె నాను మీ నడిఃమి మహివెల, యేసుక్రిస్తు వందిజ్ని వాండ్రు సిలువాదు సాతి సావు వందిజ్నె ఆవండ మరి ఇనికబా నెస్ఇ వన్ని లెకెండ మండ్రెజ్ ఇజి నాను నిర్లం కిత.

3 నాను మీ నడిఃమి వాతివలె నా సత్తు ముస్సు ఆదారం ఆవండ, సత్తు సిల్లినవన్ని లెకెండ తియెల్దాన్, ఎసొనో వణక్సి వాత.

4 నాను మీ వెట వర్గితి మాట వెహ్తిమని సువార్త, లోకు బుద్ధిదాన్ కూడితి మని తియాని మాటెజాణిజ్ ఆవతాద్. గాని మిజి తొరె ఆదెజ్

ఇజి దేవుణు ఆత్మ సత్తుదాన్ కిజిని పణిజాణిజె తోరిస్త మనాద్.

5 ఎందనిజ్ ఇహిజ, దేవుణు ముస్కు మిజి మని నమకం లోకు బుద్ది ముస్కు ఆదారం ఆవండ, దేవుణు సత్తు ముస్కునె ఆదారం ఆదెజ్ ఇజి.

దేవుణు ఆత్మ బాణిజ్ దొహ్క్కి గెణం.

6 దేవుణు ముస్కు మని నమకమ్దు పిరితివరి నడిమి బుద్దిదాన్ కూడితి మని మాటెజాణిజ్ వర్గిజినాప్. గాని అక్క యా లోకమ్దు మని యా తరమ్ది వరి బుద్ది ఆవెద్. మరి సిల్లెండ ఆజి సొన్నిని యా లోకమ్ది అతికారిజ బుద్ది ననికబా ఆవెద్.

7 ఆక్కాదె ఆవండ, దేవుణుదిజ్ డాజితి మని గెణం వందిజ్ వర్గిజినాప్. డాపె ఆతి మహి యా గెణం, మాటుబా వన్నిజ్ మని గొప్ప గవరమ్దు కూడిజి మండ్రెజ్ ఇజి లోకం పుట్టెండ ముందాల్నె దేవుణు మా వందిజ్ కేట కిత్తి ఇడ్డి మహిక.

8 యా తరమ్ది అతికారిజ ఎయెరిజ్బ యాక అర్థం కిదెజ్ అట్టెండతార్. ఎందనిజ్ ఇహిజ, వారు అర్థం కిజి నెసి మంజినిక ఇహిజ గొప్ప గవరమ్దిజ్ ప్రబు ఆతి వన్నిజ్ సిలువాదు డెయ్జి సప్వెతార్మరి.

9 అందెజె దేవుణు మాటదు రాస్తి మన్ని లెకెండ, “దేవుణు వన్నిజ్ ప్రేమిసిని వరి వందిజ్ ఇనికెజ్ తయార్ కిత ఇట్టామనాండ్రొ ఇజి ఎయెర్బా వరి కణకెజాణిజ్ సుడెదెజ్ సిల్లెద్, ఎయెర్బా వరి గిబిజాణిజ్ వెండ్రెజ్ సిల్లెద్. ఎయెర్బా వరి మన్నుదు ఎసెజ్బా ఒడెబిదెజ్ సిల్లెద్”.

10 గాని దేవుణు వన్ని ఆత్మదాన్ అయాకెజ్ మజి తెలియ కిత మనాన్. దేవుణు ఆత్మ విజు దనిజ్ రెబాజినాన్. దేవుణు లొఇ మని డాజితి మని సజతిజ్బా రెబాజి తోరిసినాన్

11 ఒరెన్ వన్ని మన్నుదు ఒడెబినికెజ్ విజు వన్ని లొఇ మని వన్ని ఆత్మనె ఆవండ మరి ఎయెర్బా నెన్వెర్. అయా లెకెండె దేవుణు

మన్నుడు మనికెళ్ల వన్ని అత్యుదిజ్నె ఆవిండ మరి ఎయెరిజ్బా తెలివద్.

12 దేవుణు బాణిజ్ మజి నెడ్డిఃనె సితమని వన్నాజ్ అర్థం కిజి నెస్తెజ్, మజి దొహ్కొత్తి మని అత్యు లోకమ్ది వరి లెకెండ ఒడఃబిని నని అత్యు అవద్. దేవుణు బాణిజ్ వాతిమని దేవుణు అత్యునె మజి దొహ్కొత్త మనాద్.

13 మాపు వర్గిజిని యా మాటెజ్ లోకు బుద్దిదాన్ నెన్పిస్తి మాటెజ్ ఆఱ. గాని దేవుణు అత్యు నెన్పిస్తి మాటెజాణిజ్, దేవుణు అత్యుదిజ్ సెందితి నిజమాతి సజతిజ్, దేవుణు అత్యుదిజ్ సెందితి మాటెజాణిజ్ మాపు వర్గిజినాప్.

14 దేవుణు అత్యు సలికాన్ దేవుణు అత్యుబాణిజ్ వాని సజతిజు డగ్గు కిఎన్. ఎండనిజ్ ఇహిజు అయాకెజ్ వన్నిజ్ బుద్ది సిల్లి పణిజ్ లెకెండ తోరిజినె. వన్నాజ్ అర్థం కిదెజ్ ఇహిజు దేవుణు అత్యుదానె అర్థం కిబె ఆదెజ్. దేవుణు అత్యు వన్ని లొఇ సిల్లితిజ్, వన్నాజ్ అర్థం కిదెజ్ వాండ్రు అట్ఎన్.

15 దేవుణు అత్యు లొఇ మనికాన్ విజు వన్నాజ్ అక్కెజ్ ఎలాగ మర్తికెజ్ ఇజు నెస్తెజ్ అట్నాన్. గాని వన్ని లొఇ ఇనికెజ్ మన్నె ఇజు ఎయెర్బా నెస్తెజ్ అట్ఎర్.

16 దేవుణు మాటదు రాసె ఆతి మని లెకెండ, “ప్రబుజ్ బుద్ది వెప్తెజ్ ఇజు వన్ని మన్నుడు మనికెళ్ల నెస్తిమనికాన్ ఎయెన్ మనాన్?”. గాని మజి క్రిస్తుజ్ మని నని మన్ను మన్నె.

### 3

#### సజమ్దు నమ్మిత్తికార్ కేట ఆజిని వందిజ్

1 తంబెరిజాండె, క్రిస్తుజ్ లొజిజు నడిఃజిని వరి వెట వర్గిని లెకెండ నాను మీ వెట వర్గిదెజ్ అట్ఎత. గాని ఒడొఃల్ది ఆసెజ్ లొజిజు నడిఃజు వరివెట వర్గిని లెకెండెనె నాను మీ వెట వర్గిత. ఎండనిజ్ ఇహిజు,

మీరు క్రీస్తు వెట కూడితి మహిదెర్ గాని క్రీస్తుజ్ సెందితి నజతిజ్ లోజిజని దని లొఇ ఏలుబా మీరు లేత కొడోర్ లెకెండెనె మనిదెర్.

2 లేత కొడోర్ పాలు సీని లెకెండె ఇజిరి సజతిజ్ నె నాను మిజీ నెస్సిస్త. పెరికార్ ఉణి మాముల్ బోజనం నని గటిమని ఇనికబా నాను మిజీ నెస్సిస్ ఎత. నిజమె ఏలుబా మీరు దనిజ్ తగ్గికిదెర్ అవెర్, మీరు లేత కొడోర్ లెకెండెనె మనిదెర్.

3 ఏలుబా మీరు యేసుక్రీస్తుజ్ లోజిజి నడిజిని వరి లెకెండె ఆఇదెర్. ఎందనిజ్ ఇహిజ మీ నడిమి గోస అనికెజ్, గొడబెజ్ మహిజ్ మీరు యేసుక్రీస్తుజ్ లోజిజి నడిజిని వరి లెకెండె ఆఇదెర్. క్రీస్తు ముస్కు నమకం మన్ ఇవరి లెకెండెనె మీరు విజు సజతిజ్ కిజినిదెర్.

4 ఎందనిజ్ ఇహిజ ఒరెన్, “నాను పవులుజ్ సెందితికాన్”, ఇజి, మరి ఒరెన్, “నాను అపొలుజ్ సెందితికాన్”, ఇజి మరి ఒరెన్, యాలెకెండె వెస్సానివలె మీరు క్రీస్తు ముస్కు నమకం ఇడోఇ మాముల్ లోకుర్ లెకెండె ఆఇదెరా?

5 అపొలు ఎయెన్? పవులు ఎయెన్? వహి పణి కినికారెగదె? ఒరెన్ ఒరెన్ వన్నిజ్ ప్రబు ఒవసెప్తి లెకెండె వారు కిత్తి పణిజాణిజ్ మీరు దేవుణుదిజ్ నమ్మిత్తిదెర్.

6 నాను గింజ ఉణుస్త, అపొలు దనిజ్ ఏరు వడిస్తాన్, గాని దనిజ్ పిరిప్తికాన్ దేవుణునె.

7 అందెజె ఉణుస్తికాన్ గాని ఏరు వడిస్తాన్ గాని ఇనిక అవెర్. గాని దనిజ్ పిరిప్తికాన్ దేవుణు ఒరెండ్రె.

8 ఉణుస్తి వన్నిజ్ ని ఏరు వడిస్తా వన్నిజ్ ఉండ్రె ఉదెనమ్ నె మహాద్. ఒరెన్ ఒరెన్ వన్నిజ్, వరి సొంత పణిదిజ్ తగితి జితం దోహ్ క్నాద్.

9 మాపు దేవుణు వెట కూడోజి పణి కినికాప్. మీరు దేవుణు మడిజ్ లెకెండె ఆతి మనిదెర్. దేవుణు ఇల్లు లెకెండె ఆతి మనిదెర్.

10 దేవుణు నా ముస్కు తోరిస్తి మన్ని దయా దర్మమ్ దాన్, నెగెండ ఇల్లు తొప్తాజ్ నెస్తివన్ని లెకెండె నాను పునాది పొక్త మన. మరి ఒరెన్ దని ముస్కు ఇల్లు తొప్సాని వన్ని లెకెండె తొప్సానాన్. ఒరెన్ ఒరెన్ ఎలాగ దని ముస్కు తొప్సానాండ్రె ఇజి వాండ్రు జాగర్త సుడోదెజ్ వలె.



11 అహిజ పొక్కిమని పునాది ఆవిండ మరి ఉండ్రీ పునాది పొక్కెజ్ ఎయెన్బా అట్ఎన్.

12 ఒరెన్ యా పునాది ముస్కు తొప్పివలె బజారమ్దాన్ తొప్పన్సు, సిల్లిజ వెండిదాన్ తొప్పన్సు, సిల్లిజ నండో కరితి రంగు పణకాణిజ్ తొప్పన్సు, సిల్లిజ మరాన్దాన్ తొప్పన్సు, సిల్లిజ గడిఃదాన్ తొప్పన్సు, సిల్లిజ ఆకుజాణిజ్ తొప్పన్సు.

13 ఒరెన్ ఒరెన్ కిత్తి పణిజ్ ఎలాగ మర్రిక ఇజి యేసుక్రీస్తు తీర్పు తీరిన్సి దినమ్దు తోరె ఆనె. అయ పణిజ్ డాజ్ఎండ తోర్పె. అయా పణిజ్ సిసు వెటనె తోరె ఆనె. ఒరెన్ ఒరెన్ కిత్తి మని పణి ఎలాగ మర్రికాదో ఇజి సిసునె పరిస కినాద్.

14 ఒరెన్ అయ పునాది ముస్కు తొప్పి మని పణి సిసుదిజ్ గెలిసి నిల్పి మహిజ వాండ్రు జితం లొసె ఆనాన్.

15 ఒరెన్ కిత్తి పణి సిసుదాన్ వెతిజ వన్నిజ్ నన్టం వానాద్. గాని వాండ్రు తప్రె ఆనాన్. గాని సిసుకొనెజ నడిఃమిహన్ తప్రె ఆతి లెకెండ తప్రె ఆనాన్లె.

16 మీరు దేవుణు గుడిః అతికిదెర్ ఇజి మీరు నెన్ఇదెరా?. మరి దేవుణు ఆత్మ మీ లొఇ బత్రిజినాన్ ఇజి మీరు నెన్ఇదెరా?

17 ఎయెన్బా దేవుణు గుడిఃదిజ్ పాడఃకిత్తిజ దేవుణు వన్నిజ్ పాడఃకినాన్. ఎండనిజ్ ఇహిజ అయ గుడిః దేవుణుదిజ్ సెందితిక. అయ గుడిః ఆతి మనికిదెర్ మీరె.

18 మిజి మీరె మొసెం కిబె ఆదెజ్ ఆఎద్. మీ లొఇ ఎయెన్బా యా తరమ్దిజ్ తగ్గి గెణం మనికాన్ వాండ్రె ఇజి ఒడిఃబిజి మహిజ, గెణం మనికాన్ ఆదెజ్ ఇజి వన్నిజ్ వాండ్రె యా లోకమ్ది వజ బుద్ధి సిలి వన్ని లెకెండ ఆపిన్.

19 ఎండనిజ్ ఇహిజ యా లోకమ్ది గెణం దేవుణు ఎద్రు పణిదిజ్ రెఇకాదె. ఎండనిజ్ ఇహిజ, “గెణం మనికార్ ఇజి ఒడిఃబిని పరిజ్ దేవుణు పరి గెణమ్దాన్ ఒడిఃస్నాన్”, ఇజి దేవుణు మాటదు రాస్త మనాద్.

20 మరి, “బుద్ధి మని పరి ఆలోసనమ్కు పణిదిజ్ రెఇకెజ్ ఇజి ప్రబు నెసినాన్”, ఇజి దేవుణు మాటదు రాస్త మనాద్.

21 అందెజె ఎయెర్బా లోకు పేరు అసి నాను వన్నిజ్ సెందితికాన్ ఇజి పొజెదెజ్ ఆవద్. మీరు నెగెండ మండ్రెజ్ ఇజి విజు సజతిజ్ దేవుణు మిజి సిత మనాన్.

22 పవులు ఆతిజ్బా, అపాలు ఆతిజ్బా, కేప ఆతిజ్బా మీరు నెగెండ మండ్రెజ్ ఇజి దేవుణు ఏర్పాటు కిత్తికావ్. లోకమ్దు మనికెజ్ విజు, పాణం ఆతిజ్బా, సావు ఆతిజ్బా, యా కాలమ్దు జర్గినికెజ్ ఆతిజ్బా, వాని కాలమ్దు జర్గిదెజ్ మనికెజ్ ఆతిజ్బా విజు మీరు నెగెండ మండ్రెజ్ ఇజి దేవుణు సితికెజ్.

23 మీరు క్రీస్తుజ్ సెందితికిదెర్. క్రీస్తు దేవుణుదిజ్ సెందితికాన్.

## 4

### క్రీస్తుజ్ అపొస్తురు ఆతికార్

1 అందెజె క్రీస్తుజ్ పణి కినికార్ ఇజి లోకుర్ మజి సుడెదెజ్ వలె. దేవుణుది డాజెతి మని సజతిజ్ లోకురిజ్ నెస్పిస్తెజ్ ఒపజెపె ఆతికార్ ఇజి వారు మజి సుడెదెజ్ వలె.

2 అక్కాదె ఆవెండ ఉండ్ర పణిదిజ్ ఒపజెపె ఆతి మనికాన్ అయ పణిదు నమ్మకమాతికాన్ ఇజి తోరె ఆదెజ్ వలె.

3 మీరు గాని లోకురి కోర్బుబగాని నజి ఒపెజెపె ఆతి మని పణి నాను నెగెండ కిజిననొ సిలెనొ ఇజి సుడెజిని దనిజ్ నాను అస్యం కిఎ. నజి నానెబా అయ లెకెండ నా పణిదిజ్ సుడెదెజ్ సిల్లె.

4 నా గర్బం నజి గదిన్ఎండ బాగనె మనాద్. అయ లెకెండ మహిజ్బ నాను ఇని తవు సిలికాన్ ఇజి వెహె ఆదెజ్ అట్ఎ. నజి తీర్పు సీనికాన్ ప్రబునె.

5 అందెజె ఏర్పాటు కిత్తి మని గడియ రెఎండ ఇనిదనిజ్బా తీర్పు తిరిస్తెజ్ ఆవద్. ప్రబు వాని దాక కాప్కిదెజ్. సీకటుదు డాజెతి మని విజు తప్పు పణిజ్ వాండ్రు వెల్లి జాయ్దు తనాన్లె. లోకురి మన్నుదు మహి విజు ఉదెనమ్కాజ్ వెల్లి తనాన్లె. అయావలె ఒరెన్ ఒరెన్ వన్నిజ్ వాండ్రు కిత్తి పణిదిజ్, తగ్గి లెకెండ దేవుణు బాణిజ్ పొగ్డె ఆనాన్లె.

6 తంబెరిజాండె, “రాస్తి మహి దనిజ్ జవ డాట్టి సాండ్రెజ్ ఆఎద్”, ఇజి రాస్తి మని మాటదిజ్ అర్థం మీరు మజి సుడఃజి నెస్టెజ్ వలె. యాలెకెండెనె నా వందిజ్ ని అపొలొ వందిజ్ నాను మిజ వెహ్తా మహా. అయాలెకెండె మీరు ఒరెన్ వన్ని పేరు అసి పొజిదెజ్ ఆఎద్.

7 మహి వరిజ్ ఇంక మిజి గొప్పు పెరికార్ కిత్తికాన్ ఎయెన్? మిజి కలిగితి మని బుద్ధిని గెణం లొఇ దేవుణు బాణిజ్ దొహ్కెక్కినె ఆవిండె మరి ఇనికెజ్ మన్నె? అక్కెజ్ మిజి దేవుణు బాణిజ్ దొహ్కెక్కి వెనుక, అక్కెజ్ దొహ్కెక్కి ఆడ, అక్కెజ్ మీరు గణస్తి మని లెకెండె పొజిజినిదెర్.

8 ఏలు మీరు ఇనికబా తకు సిల్లెండె మిజి కావాలిస్తికెజ్ విజు మనికిదెర్ అతిదెర్గె! ఏలు మీరు ఆస్తి మనికిదెర్ ఆతిదెర్గె! మజి డిస్తి సితిదెరె మీరు దేవుణు వెట ఏలుబడిః కినికిదెర్ ఆతిదెర్గె! మపుబా మీ వెట దేవుణు వెట ఏలుబడిః కినికాప్ అని లెకెండె మీరు నిజమె మీరు ఆజిమంజినిక ఇహిజ ఎసొనొ నెగెద్ ఇజి నాను ఎసొనొ కోరిజిన.

9 మజి అయా లెకెండె సిల్లెద్. జంతుజు వెట విద్దెం కిజి సుడఃజి మంజిని వరి ముందాల సాదెజ్ ఇజి సావుదిజ్ తగితి సిక్కు దొహ్కెక్కి మని వరి లెకెండె దేవుణు మజి అపొస్తురు లొఇ కడఃవేరిదికార్ లెకెండె కిత మనాన్ ఇజి నజి తోరిజినాద్. లొకమ్దు మనికార్ విజెరె, మరి దేవుణు దూతెజ్ విజు కణ్ణు నప్ఎండె బేసిని లెకెండె మాపు ఇడః ఆత మనాప్ ఇజి నజి తోరిజినాద్.

10 మాపు క్రీస్తు వందిజ్ బుద్ధి సిలికాప్ గె గాని మీరు క్రీస్తు లొఇ బుద్ధి మనికిదెర్గె! మాపు నీరసమ్దికాప్ గె మీరు నత్తు మనికిదెర్గె! మీరు తగమాతికిదెర్గె మపు సిగు లాగె ఆతికాప్ గె!

11 ఏలు యా గడఃయాదుబా బజు ఏహ్కెదికాప్. గుడెజ్ తొహె ఆతికాప్. ముటిజాణిజ్ గుదె ఆతికాప్. మండ్రెజ్ ఇల్లుబా సిలికాప్.

12 మా సొంత కికాణిజ్ కస్టబాడఃజి పణి కినికాప్. మజి సయిప్ సీని వరిజ్ మిజి నెగెండె మనిద్ ఇజి వెహ్సినాప్. మజి హిమ్మెజ్ కినివలె అక్కెజ్ ఓరిసినిాప్.

13 దూసె అనివలె సార్లిదాన్ వర్గిజినాప్. ఏలు యా గడఃయాదుబా

మాపు యా లోకమ్ దిజ్ కనర లెకెండ్ మనాప్. విజెరె ఎద్రు పెంటు లెకెండ్ మనాప్.

14 నాను ప్రేమిసిని నా కొడొఱ్ ఇజి మిజి సారిసి సరిసి వెప్తి లెకెండ్ నె యా మాటెజ్ రాసిన, గాని మిజి సిగు కిదెజ్ ఇజి ఆవెద్.

15 క్రీస్తు వందిజ్ మిజి సూణికార్ పదివెయుజ్ లోకుర్ మహిజ్ బా, మిజి అప్పొసిన్ నండొండార్ సిల్లెర్. ఎందనిజ్ ఇహిజు క్రీస్తుయేసు వందిజ్ నాను వెప్తి సువార్తదాన్ నానె మిజి కాస్త.

16 అందెజె నజి పోలిసి యేసుక్రీస్తుజ్ లోజిజి నడిదెజ్ ఇజి మిజి బతిమాల్లిన.

17 దిని వందిజ్ ప్రబు ఎద్రు నమ్మకమాతికాన్ ఆతి, నాను ప్రేమిసిని నా మరిన్ ఆతి తిమోతిజ్ మీ డగ్రు పోక్సిన. విజు బాడ్డిజు విజు దేవుణు సజమ్ కాజ్ నాను నెస్పిస్తి దనిజ్ తగితి లెకెండ్ క్రీస్తుయేసుజ్ నాను ఎలాగ లోజిజి నడిజిన ఇజి వాండ్రు మిజి ఎత్తు కిబిస్నాలె.

18 మీ లోఇ సెగొండార్ నాను మీ డగ్రు రెవ్ ఇజి ఉబె ఆత మనార్.

19 ప్రబు సితం ఇహిజు నాను మీ డగ్రు బేగి వాన. అయావలె ఉబె ఆతిమని వరి మాటెజ్ నె ఆవండ, వరిజ్ ఎసో సత్తు మనాద్ ఇజిబా నాను సూణ.

20 ఇనిక ఇహిజు, దేవుణు ఏలుబడిః ఇహిజు వర్గిని మాటెజాణిజ్ నె ఆవెద్, సత్తుదాన్ మనాద్.

21 మీరు ఇనిక కోరిజినిదెర్? నాను మీ డగ్రు వానివలె మిజి దిదిదెజ్ డుడ్డు అసి వాదెజా, సిల్లిజు ప్రేమ తోరిసిని వన్ని లెకెండ్ వాదెజ్?

## 5

రంకు బూలాని వన్నిజ్ మీ బాణిజ్ వెల్లి పొక్తు

1 రంకు బూలానిక మీ లోఇ మనాద్ ఇజి నజి నిజమె కబ్బు వాతాద్. మీ లోఇ ఒరెన్, వన్ని కొగ్రి అయ్ సిజ్ ఇడెః ఆతాన్ గె. ననిక నమ్మిఇ వరి లోఇబా జర్గిక.

2 మరి, యాక మీ నడిమి మంజి మీరు పొజిజినిదెర్! గాని అయాలెకెండ్ ఆవండ, మీరు ఎసానొ దుకం ఆజి నన్ని పణి కిత్తి వన్నిజ్ మీ నడిమిహాన్ వెల్లి పొక్కి మండ్రెజ్, అయాలెకెండ్ మండ్రెజ్ గదె?

3 నాను ఒడొల్ వందిజ్ మీ బాణిజ్ దూరం మన్ను, గాని ఆత్మదాన్ నాను మీ వెటనె మన్ను. నాను మీ వెట మన్ని లెకెండ్నె నిన్ని పణి కిత్తి వన్ని ముస్సు తీర్పు తీరస్త మన్ను.

4 మా ప్రబు ఆతి యేసు పేరుదాన్ మీరు కూడొజి వానివలె, మా ప్రబు ఆతి యేసుక్రీస్తు సత్తు మీ నడిమి మంజినాద్. నానుబా మీ వెట మన్ను ఇజి మీరు ఒడిబిదు.

5 అయావలె మీరు యా లెకెండ్ కిదు. సయ్యూనుజ్ లొజిజి మన్ని వరి వెట మండ్రెజ్ ఇజి వన్నిజ్ మీ నడిమిహాన్ వెల్లి పొక్తు. అబ్బె వన్ని ఒడొల్ కస్టమ్దిజ్ ఒవజెపె ఆనాద్లె. అయావలె వాండ్రు పాపం ఒప్పుకొడొజి డిసిసిజి, యేసుప్రబు యా లొకమ్దిజ్ తీర్పు తీరిసిని దినమ్దు వన్ని ఆత్మ తప్రె ఆనాద్లె.

6 మీరు పొజిజినిక బాగ సిల్లెద్. పులాని దూరు కండెక్ ఆతిజ్బా పులాజ్ సిల్లి దూరుదు కలప్తిజు, దూరు విజు పులాజ్ ఆనాద్ ఇజి మీరు నెసినిదెర్. నెఇకెజ్ మీ నడిమి మహిజు అయలెకెండ్నె మన్వేదా?

7 అందెజె నిజమె పులాని దూరు లెకెండ్ మన్ని వన్నిజ్ మీ నడిమిహాన్ దూరం కిదు ఇజి నాను మిజి గటిజు వెప్పిన. అయావలె మీరు పులాజ్ సిల్లి నెగ్గి దూరు లెకెండ్ మనిదెర్. నిజమె మీరు పులాజ్ సిల్లి కొత్త దూరు నన్నికిదెర్, ఎందనిజ్ ఇహిజు పస్కు పండొయ్దిజ్ సప్పి గొర్రెపిల్ల లెకెండ్ యేసుప్రబు మా వందిజ్ వూజు ఆత మనాన్.

8 అందెజె పులాజ్ మన్ని పడొయి దూరుదాన్ పిటం సుర్జి మాటు పండొయ్ కిమాట్. ఇహిజు, ముజాల మహి సెఇ అలవాటుజ్, ముజాల కిజి మహి సెఇ పణిజాణిజ్ మాటు పండొయ్ కిమాట్. నాను వెప్పానిక ఇనిక ఇహిజు, మాటు నిజం మన్నికాట్ని నమ్మిదెజ్ తగ్గికాట్ ఆజి మంజినాట్. అయాలెకెండ్ మాటు పండొయ్ కిమాట్.

9 రంకు బూలాని వరి వెట కూడొజి మన్మాట్ ఇజి మిజి రాస్సి ఉత్తమ్దు రాస్త మన్ను.

10 యా లోకమ్మదు మన్ని రంకు బూలాని వరివెటనో, లోబం కిని వరివెటనో, డోజి కిని వరివెటనో, బొమ్మోజు మాడిసిని వరివెటనో మీరు ఎసెజ్బా కూడెదెజ్ ఆవద్ ఇజి దన్నిజ్ అర్థం సిల్లెద్. అయాలెకెండ మండ్రెజ్ ఇహిజ మీరు యా లోకం డిసి సొండ్రెజ్ గదె?

11 నాను మిజి రాస్తి మన్ని దన్నిజ్ అర్థం ఇనిక ఇహిజ, నమ్మితికాన్ ఇజి కూకె ఆతికాన్ ఎయెన్బా రంకు బూలానికాన్ ఆతిజనో, లోబం కినికాన్ ఆతిజనో, బొమ్మోజ్ మాడిసినికాన్ ఆతిజనో, సెజ మాటెజ్ వర్గినికాన్ ఆతిజనో, కడు ఉణికాన్ ఆతిజనో, ఇల్లు డెయ్జి డోజి కినికాన్ ఆతిజనో, నన్ని వన్ని వెట కూడెజి మండ్రెజ్ ఆవద్. వన్ని వెట బోజనమ్బా కిదెజ్ ఆవద్.

12 దేవుణు సజమ్దిజ్ వెల్లి మన్ని నమ్మిజకార్ ఆతి వరి ముస్సు. తీర్పు తీరిసినిక, నా పణి ఆవద్. సజమ్దు మన్ని వరి ముస్సు మీరు తీర్పు కిఇదెరా?

13 సజమ్దిజ్ వెల్లి మన్ని వరిజ్ దేవుణునె తీర్పు తీరిస్సికాన్. అందెజె, “అయ సెజ వన్నిజ్ మీ నడిమిహాన్ వెల్లి పొక్కు”.

## 6

### నమ్మిత్తి వరి నడిమి గొడెబెజ్ మహిజ

1 మీ లొఇ ఒరెన్ మరి ఒరెన్ వన్ని వెట గొడెబ మహిజ, దేవుణుదిజ్ సెందితివరి ఎద్దు రెఎండ, వాండ్రు ఎందనిజ్ నమ్మిజ వరి ఎద్దు తీర్పు వందిజ్ సొన్నినాన్?

2 దేవుణుదిజ్ సెందితికార్ యా లోకమ్దిజ్ తీర్పు తిరిసినికె ఇజి మీరు నెన్ఇదెరా? మీరు యా లోకమ్దిజ్ తీర్పు తీరిసినికిదెర్ ఆతిదెర్. అయ లెకెండ మహివలె మీ లొఇ మని గొడెబెజి వందిజ్ తీర్పు తీరిస్సెజ్ మీరు అట్ఇతిదెరా?

3 మాటు దేవుణు దూతరిజ్ తీర్పు తీరిసినికాట్ ఇజి మీరు నెన్ఇదెరా? ఆహిజ యా లోకమ్దిజ్ సెందితి సజతిజి వందిజ్, మరి తీరిస్సెజ్ అట్టికాట్.

4 అందెజె నని గొడఁబెజ్ మీ నడిఁమి మహిజ, వనకాజ్ తీర్పు తీరిస్తెజ్ ఎందనిజ్ మీరు సజమ్దు ఇనికబా ఆఇవరి ఎద్రు తీర్పు వందిజ్ బన్నిదెర్?

5 మీరు సిగు ఆదెజ్ ఇజినె ఇక్క నాను వెహ్సిన. దేవుణుదిజ్ నమ్మిత్తి వరి లొఇ మని గొడఁబెజ్ తీరిస్తెజ్ అట్టికాన్ ఎయెన్బా మీ నడిఁమి సిల్లెండ్రా?

6 గాని ఒరెన్ నమ్మిత్తికాన్ మరి ఒరెన్ నమ్మిత్తి వన్ని వెట గొడఁబెజ్ ఆజి కోర్టుదు సొన్నినిదెర్. అక్కాదె ఆవిండ తీర్పు వందిజ్ నమ్మిఇ వరి ఎద్రు తగుదిజ్ బనయి కిజినిదెర్.

7 మీ నడిఁమి ఎయెరిజ్బా ఒరెన్ వెట కోర్టు కిత్తి మని గొడఁబెజ్ మన్నె ఇహిజ మీరు పూర్తి అడిగి అర్తి మనిదెర్. కోర్టు కిని దనిజ్ ఇంక మీ వెట కిత్తి తపు బరిసినికాదె నెగెద్. కోర్టు కిని దనిజ్ ఇంక డొజ కిజి ఒతిక డిఁసినికాదె నెగెద్.

8 గాని మీరె మొసెం కిజినిదెర్, తపు కిజినిదెర్. యాక నమ్మిత్తి కూలెజ వెటనె మీరు కిజినిదెర్.

9 సెఇ పణిజ్ కినికార్ దేవుణు ఏలుబడిఁదు మండ్రెజ్ అల్వెర్ ఇజి మీరు నెన్ఇదెరా? మీరు ఒడఁబినిబాన్ తపు కిమాట్. రంకు బూలానికార్, బొమ్మెజ మాడిఁసినికార్, సాని బూలానికార్, మొగవరి వెట కూడ్డి మొగ్గకొడొర్,

10 డొజ కినికార్, లోబం కినికార్, ఎస్తివలెబా కడు ఉణిజి సొసి మంజినికార్, దూసలాడిఁజినికార్, ఇల్లు డెయ్జి డొజ కినికార్, నినికార్ ఎయెర్బా దేవుణు ఏలుబడిఁదు మండ్రెజ్ అక్కు మనికార్ ఆవెర్.

11 మీ లొఇ సెగొండార్ యా లెకెండెనె మహిదెర్. గాని మీ పాపమ్కాణిజ్ నొరె ఆజి సుబరం ఆతికిదెర్. మా ప్రబు ఆతి యేసుక్రీస్తు పేరుదాన్ని, మా దేవుణు ఆత్మదాన్ నీతినిజొమ్మిమనికార్ ఆతికిదెర్. మరి ఏలు దేవుణు వందిజ్ కేట ఆతికిదెర్.

రంకు బూలానిక

12 “ఇనిక కిదెజ్బా మజి అక్కు మనాద్, ఇని అడ్డు సిల్లెద్”, ఇజి మీరు వెప్పినిదెర్. గాని విజు పణిదిజ్ వానికెజ్ ఆఉ ఇజి నాను వెప్పిన్, “ఇనిక కిదెజ్బా నజి అక్కు మనాద్, ఇని అడ్డు సిల్లెద్”. అహిజ్బా నాను కిని దని లొఇ ఇనికబా నజి ఉండ్రీ అలవాటు లెకెండ మండ్రెజ్ నాను సరి సిఎ. ఎందనిజ్ ఇహిజ అయక సిల్లెండ బత్తిదెజ్ ఇజి ఉండ్రీ అలవాటుదిజ్ అణజిజి మన్ఎ.

13 “తిండి పొటదిజ్ సర్ల వందిజ్ని పొట తిండి ఊణి వందిజ్నె తయార్ కిత మనాద్”, ఇజి మీ లొఇ సెగొండార్ వెప్పినిదెర్. గాని వాని కాలమ్దు పొట గాని తిండి గాని అక్కర్ సిల్లెద్. అందెజె దేవుణు రుండి వనకాజ్ సిల్లెండ కినాన్లె”, ఇజి నాను వెప్పిన్. ఒడొల్ రంకు బూలాని వందిజ్ ఆవద్ ఇజి నాను గటిజ వెప్పిన్. గాని మా ఒడొల్ ప్రబు వందిజ్ పణి కిదెజ్నె. ఒడొల్ వందిజ్ సూణికాన్ ప్రబునె.

14 దేవుణు వాని కాలమ్దు మా ఒడొలుజు సాతి వరిబాణిజ్ వన్ని సత్తుదాన్ నిక్కాన్లె. అయావలె సాతి వరిబాణిజ్ ప్రబుజ్ నిక్తి లెకెండ మజిబా నిక్కాన్.

15 మీ ఒడొల్ క్రిస్తు ఒడొల్ ఆతి దేవుణు సజమ్దు మని నమ్మిత్తి వరి వెట కూడితి మనికెజ్ ఇజి మీరు నెన్ఇదెరా? అయాలెకెండ మహిజ ఎయెన్బా క్రిస్తు వెట కూడితి మని వన్ని ఒడొల్ ఉండ్రీ సాని దనివెట కుడుఃప్తిజ అయాక తగ్గాదా? ఆవద్, వాండ్రు ఎసెజ్బా అయక కిదెజ్ ఆవద్.

16 సాని దనివెట కూడెనికాన్ దని వెట కూడెజి ఉండ్రె ఒడొల్ ఆతి లెకెండ మనాద్, ఇజి మీరు నెన్ఇదెరా?. “వారు రిఎర్ ఉండ్రె ఒడొల్ ఆన మంజినార్”, ఇజి దేవుణు మాటదు రాస్త మనాద్.

17 గాని వన్నిజ్ వాండ్రె ప్రబు వెట కుడుఃపె ఆతి మనికాన్, వాండ్రు ఒడిబిని దని లొఇ ప్రబు ఆత్మ వెట ఉండ్రె ఆజి మంజినాన్.

18 రంకు బూలాఎండ దని బాణిజ్ దూరం ఉహ్క్కి మండ్రు. లొకుర్ కిజిని విజు పావమ్కు ఒడొల్దిజ్ వెల్లి మనికెజ్నె. గాని రంకు బూలానికాన్ వన్ని సొంత ఒడొల్దిజ్ వెత్తెకం కిజినాన్.

19 దేవుణు బాణిజ్ మిజి దొహ్క్తి మని మీ లొఇ మని దేవుణు ఆత్మ



మంజని గుడిఃనె మీ ఒడొఃల్ ఇజి మీరు నెన్ఇదెరా? అందెజె మీరు మీ సొంత ఆఇదెర్.

<sup>20</sup> మీరు గొప్ప కరిదాన్ కొలె ఆతి మహికిదెర్. అందెజె మీ ఒడొఃల్దాన్ దేవుణుదిజ్ గవరం సీదు.

## 7

### పెండ్లి వందిజ్ వెప్పిక

<sup>1</sup> మీరు రాస్తొమని సజతిజ వందిజ్ ఏలు నాను వెప్పిన. పెండ్లి ఆవండ మంజనిక మొగ్గ కొడొఃదిజ్ నెగెద్.

<sup>2</sup> గాని రంకు బూలానిక లావ్ మనిజ్ ఒరెన్ ఒరెన్ వన్నిజ్ సొంత బోదెలి మండ్రెజ్. విజు బోదెకాజ్ వరి సొంత మాసి మండ్రెజ్ వలె.

<sup>3</sup> మాసి ఆల్ని వందిజ్ కిదెజ్ మనికెజ్ విజు కిజి మండ్రెజ్ వలె. ఆల్నిబా మాసి వందిజ్ అయాలెకెండ్నె మండ్రెజ్ వలె.

<sup>4</sup> ఆల్ని ఒడొఃల్ దనిజె సొంతం ఆవండ దని మాసిజ్బా సెందితిక. అయాలెకెండ్నె మాసి ఒడొఃల్ వన్నిజె సొంతం ఆవండ వన్ని ఆల్నిజ్బా సెందితిక.

<sup>5</sup> పార్దనం కిని వందిజ్ మిజి సమయం దొహ్కొక్కి వందిజ్నె ఆవండ, రిఎర్ కూడొఃజి ఒప్వండ మీరు కేట కేట మండ్రెజ్ ఆవెద్. గాని మీ ఆసెజ అణస్తొ ఆజి మండ్రెజ్ అట్వండ మనిజ్, సయ్తాను మిజి తవు కిబిసి అర్పైజ్ సరి సెవండ ఉండ్రెబానె కూడొఃజి మండ్రు.

<sup>6</sup> మిజి యాలెకెండ్ కిదెజ్ ఆనాద్ ఇజి యాక నాను వెప్పిన, గాని ఉండ్రె ఆడ్ర లెకండ్ ఆవెద్.

<sup>7</sup> విజెరె నాను మని లెకెండ్ పెండ్లి ఆవండ మహిజ బాగ మనాద్ ఇజి ఆస ఆజిన. గాని ఒరెన్ ఒరెన్ వన్నిజ్ దేవుణు బాణిజ్ ఉండ్రె ఉండ్రె వరం దొహ్కొక్త మనాద్. ఒరెన్ వన్నిజ్ యా వరం, మరి ఒరెన్ వన్నిజ్ మరి ఉండ్రె వరం.

<sup>8</sup> ఏలు పెండ్లి ఆఇ వరి వెటని రాండి బోదెకాజ్ నాను వెప్పనిక ఇనిక ఇహిజ, నాను మంజని లెకెండ్ పెండ్లి ఆవండ మంజనికాదె వరిజ్ నెగెద్.

9 గాని వరి ఆసెజ అణస్సె ఆజి మండ్రెజ్ అబ్ఎర్ ఇహిజ వారు పెండ్లి ఆదెజ్ వలె. ఎందనిజ్ ఇహిజ మన్నుదు ఉత్పుత్ ఆజి సిసుదాన్ వెయని లెకెండ్ మనిదనిజ్ ఇంక పెండ్లి ఆనిక నెగెద్.

10 పెండ్లి ఆతి వరిజ్ నాను సీజిని ఆడ్ర, నానె ఆవిద్ దేవుణు సిజిని ఆడ్ర ఇనిక ఇహిజ, ఆల్సి, దని మాసిజ్ డిసి సొండ్రెజ్ ఆవెద్.

11 అది మాసిజ్ డిసి సొహిజ మరి ఉండ్రె పెండ్లి ఆదెజ్ ఆవెద్. మరి పెండ్లి ఆవిండ మండ్రెజ్ ఇస్టం సిల్లెద్ ఇహిజ, దని మాసి వెట రాజినం ఆజి సమాదనం ఆజి మండ్రెజ్ వలె. మరి ఒరెన్ మాసి వన్ని ఆల్సిజ్ డిసి సీదెజ్ ఆవెద్ ఇజిబా వన్ని ఆడ్ర మనాద్.

12 మహి వరిజ్ నాను వెహ్నినిక ఇనిక ఇహిజ, ప్రబు ఆవెన్ నానె, నమ్మితికాన్ ఆతి ఒరెన్ వన్ని ఆల్సి నమ్మితికాద్ ఇహిజ్బా, అది వన్ని వెటనె బత్కినాద్ ఇహిజ వాండ్రు దనిజ్ డిసి సీదెజ్ ఆవెద్.

13 మరి, ఉండ్రె నమ్మితికాద్ ఆతి బోదెల్దిజ్, మాసి నమ్మితికాన్ ఇహిజ్బా దని వెటనె వాండ్రు బత్కినాన్ ఇహిజ అది వన్నిజ్ డిసి సీదెజ్ ఆవెద్.

14 ఎందనిజ్ ఇహిజ నమ్మితికాన్ ఆతి మాసి నమ్మితికాద్ ఆతి వన్ని ఆల్సి వెట దేవుణు వందిజ్ కేట ఆతికాన్ కిబె ఆత మనాన్. అయా లెకెండ్నె నమ్మితికాద్ ఆతి ఆల్సి నమ్మితికాన్ ఆతి దని మాసి వెట దేవుణు వందిజ్ కేట ఆతికాద్ కిబె ఆత మనాద్. యా లెకెండ్ సిల్లెండ మహిజ మీ పొటాద్ పుట్టి కొడోర్, దేవుణుదిజ్ నమ్మితి వరి కొడోర్ లెకెండ్ మంజినార్, గాని ఏలు దేవుణు వందిజ్ ఆతికారె.

15 గాని ఆల్సి మాసిర్ లొఇ నమ్మితికాన్ ఆతి మాసి గాని నమ్మితికాద్ ఆతి ఆల్సి గాని డిసి సీదెజ్ ఇజి ఆస ఆతిజ ఆహె కిపిర్. అయాలెకెండ్ జర్గినివలె, నమ్మితికాన్ నమ్మితి దనిజ్ గాని నమ్మితికాద్ నమ్మితి వన్నిజ్ గాని కూడోజి మన్అ ఇజి బలవంతం కిదెజ్ ఆవెద్. సమాదనమ్దాన్ బత్కిదెజ్ ఇజినె దేవుణు మిజి కూక్త మనాన్.

16 ఓ, బోదెలి నీ మాసిజ్ దేవుణు రక్సిన్సి లెకెండ్ కిదెజ్ అట్టిదొ సిల్లెదొ ఇజి నీను ఎలాగ నెస్సి? ఓ, మొగకొడో నీ ఆల్సిజ్ దేవుణు

రక్తిస్తే లెకెండ్ కిదెజ్ అట్టిదొ సిల్లెదొ ఇజి నీను ఎలాగ నెస్సి?

17 ఒరెన్ ఒరెన్ ఎలాగ బత్తిదెజ్ ఇజి దేవుణు ఒపసెప్ప మనాండ్రో అయాలెకెండ్ మండ్రెజ్ వలె. ఎలాగ మండ్రెజ్ ఇజి దేవుణు కూక్త మనాండ్రో దనిజ్ తగితి లెకెండ్ వారు మండ్రెజ్ వలె. ఇక్కడె విజు సజమ్కాజ్ నాను సితీ మని రూలు.

18 ఎయెన్బా దేవుణు వన్నిజ్ కూక్తివలె సునతి కిబె ఆతికాన్ ఇహిజు వాండ్రు సునతి కిబె ఆతి లెకెండ్నె మండ్రెజ్ వలె. అయాక మారిస్టెజ్ సుండెదెజ్ ఆవెద్. మరి ఒరెన్ దేవుణు వన్నిజ్ కూక్తి వలె సునతి కిబె ఆఇకాన్ ఇహిజు వాండ్రు సునతి కిబె ఆదెజ్ సుండెదెజ్ ఆవెద్.

19 సునతి కిబె ఆతిజ్బా ఇనిక సిల్లెద్. సునతి కిబె ఆఇజ్బా ఇనిక సిల్లెద్. దేవుణు ఆగ్నెజ్ లొజిజి నడినికాదె ముకెలమతిక.

20 ఒరెన్ వన్నిజ్ ఎలాగ మహివలె దేవుణు వన్నిజ్ కూక్త మనాండ్రో అయాలెకెండ్నె వాండ్రు మండ్రెజ్ వలె.

21 నీను వెట్టిపణి కిజి మహిజ్ కూకె ఆతిజు దని వందిజ్ బాద ఆమ. అబెణిజ్ విడుడల ఆదెజ్ నిజి అక్కు మనాద్ ఇహిజు ఆహె కిఅ.

22 ఒరెన్ వెట్టిపణి కినికాన్ ఆతి మహిజ్ దేవుణు ముస్కు నమకం ఇట్టాన్ ఇహిజు వాండ్రు దేవుణుదిజ్ సెందితికాన్ నీ పాపమ్కాజ్ విడుడల ఆతి లెకెండ్ ఆజినాన్. అయాలెకెండ్నె అక్కు మనికాన్ దేవుణు ముస్కు నమకం ఇట్టాన్ ఇహిజు వాండ్రు క్రిస్తు వందిజ్ వెట్టిపణి కినికాన్ లెకెండ్ ఆజినాన్.

23 నండొ విలువదాన్ కొలె ఆతికార్ మీరు, అందెజె లోకురి బుద్దిదిజ్ వెట్టిపణి కినివరి లెకెండ్ ఆమాట్.

24 నమ్మిత్తికిదెర్ ఆతి మా తంబెరిజాండె, ఒరెన్ ఒరెన్ ఎలాగ మండ్రెజ్ ఇజి దేవుణు ఇట్ట మనాండ్రో అయాలెకెండ్ మండ్రెజ్ వలె. ఎలాగ మహివలె దేవుణు కూక్త మనాండ్రో అయాలెకెండ్నె దేవుణు వందిజ్ బత్తిదెజ్ వలె.

25 ఏలు విడ్డి అయ్లిక వందిజ్ నజి ప్రబు బాణిజ్ ఇని ఆడ్ర సిల్లెద్. గాని దేవుణు కనికారమ్దాన్ నమ్మిదెజ్ తగ్గికాన్ ఇజి నజి ఒండెబిజిని వందిజ్ నాను ఒండెబినికెజ్ వెహిసెన్.

26 యా లోకమ్దు ఏలుమని కస్టమ్కు సుడఃతిజ ఎయెన్బా వాండ్రు మని లెకెండెనె మహిజ నెగెద్ ఇజి నాను ఒడిఃబిజన.

27 నీను పెండ్లి ఆతి మనిదా? అహిజ డిఃసి సీదెజ్ సుడఃమా. పెండ్లి ఆవిండ మహిజ పెండ్లి ఆదెజ్ సుడఃమా.

28 నీను పెండ్లి ఆతిజ పాపం ఆవద్. విడిఃఅయ్లి పెండ్లి ఆతిజ పాపం ఆవద్. గాని పెండ్లి ఆతి వరిజ్ యా బత్కుదు నండో కస్టమ్కు మంజినె. అయాకెజ్ మిజి రెఎండ మండ్రెజ్ ఇజినె నాను కోరిజిన.

29 తంబెరిజాండె, నాను వెప్పినిక ఇనిక ఇహిజ ఏర్పాటు కిత్తిమని సమయం ఆదెజ్ కాలం కండెక్నె మనాద్. ఆల్సిక్ మనికార్ ఏలుదాన్ ఆల్సిక్ సిలివరి లెకెండ బత్కిదెజ్.

30 అడఃబనికార్ అడఃబఇ వరి లెకెండ మండ్రెజ్ వలె, సర్ల ఆనికార్ సర్ల ఆఇకార్ లెకెండ మండ్రెజ్ వలె, కొణికార్ మాపు కొటిక మా వందిజ్ ఇడిః ఆనికాప్ ఆవప్ ఇజి మండ్రెజ్ వలె.

31 యా లోకమ్దు మనికెజ్ వ్రాడఃజినికార్ వనక వందిజ్ మని ఆసదాన్ మన్సు నిండ్రెజి మండ్రెజ్ ఆవద్. యా లోకం ఏలు మని లెకెండ ఎస్తివలెబా మన్ఎండ, సిల్లెండ ఆనాద్లె.

32 మీరు విసారిసి మంజిని వరి లెకెండ మండ్రెజ్ ఆవద్ ఇజి నాను కోరిజిన. పెండ్లి ఆఇకాన్ ఎలాగ ప్రబుజ్ సర్ల కిదెజ్ అట్ను ఇజి ప్రబుజ్ సెందితి సజతిజ్ వందిజ్ ఒడిఃబిజి మంజినాన్.

33 పెండ్లి ఆతికాన్ ఎలాగ ఆల్సిజ్ సర్ల కిదెజ్ అట్ను ఇజి యా లోకమ్దిజ్ సెందితి సజతిజ వందిజ్ ఒడిఃబిజి మంజినాన్.

34 వాండ్రు రుండి దరొటు లాగె ఆజినాన్. అయాలెకెండెనె పెండ్లి ఆఇ బోదెలి గాని ఉండ్రె విడ్డిః అయ్లి గాని దేవుణుదిజ్ సెందితి సజతిజ వందిజ్ ఎత్తు కిజి మంజినాద్. పూర్తి ఆత్మదాన్ పూర్తి ఒడఃల్దాన్ దేవుణు వందిజ్ కేట మండ్రెజ్ ఇజి అది ఒడిఃబిజినాద్. గాని పెండ్లి ఆతికాద్ మాసిజ్ ఎలాగ సర్ల కిదెజ్ అట్ను ఇజి యా లోకమ్దిజ్ సెందితి వన్కా వందిజ్ ఒడిఃబిజి మంజినాద్.

35 మీరు నెగెండ మండ్రెజ్ ఇజినె నాను వెప్పిన, మిజి అడ్డు కిదెజ్ ఇజి సిల్లెద్. మీరు ఇతల్ అతల్ ఆవిండ దేవుణు దరొట్ నెగెండ

మంజి బత్ కిదెజ్ ఇజి వెహ్సిన.

36 ఎయెన్ బా, వన్ని వందిజ్ పేరు కిత్తి అయ్ లిదిజ్ పెండ్లి కిఎండ మంజి, దనిజ్ సిగు కిబిస్నాన్ ఇజి వన్నిజ్ తోరితిజ, దనిజ్ వయ్ సు డాట్సినాద్ ఇజి ఒడిఃబిజి దనివెట పెండ్లి ఆదెజ్ వలె ఇజి ఒడిఃబితిజి వాండ్రు కోరిజిన లెకెండ కిదెజ్ వలె. వాండ్రు కినిక పాపం ఆఎద్. వారు పెండ్లి ఆదెజ్ వలె.

37 ఎయెన్ బా పెండ్లి ఆదెజ్ ఇని బలవంతం సిల్లెండ, వన్నిజ్ వాండ్రె వన్ని గర్బం గదిన్ ఎండ పూర్తి అణసె ఆదెజ్ అట్వాన్ ఇజి అయ్ అయ్ లి వెట నాను పెండ్లి ఆఎ ఇజి, అయా సజతి వందిజ్ వన్ని మన్సుదు గటిజ తీర్మనం కిత్తాన్ ఇహిజ, వాండ్రు కిని తీర్మనమ్ బా నెగ్గికాదె.

38 అందెజె వన్నిజ్ పేరు కిత్తి అయ్ లిదిజ్ పెండ్లి కినికాన్ నెగ్గిక కిజినాన్. అయాలెకెండ పెండ్లి ఆఇకాన్ మరి ఒదె నెగ్గిక కిజినాన్.

39 మాసి బత్తితి మనిదాక ఆల్సి వన్ని వెట మండ్రెజ్ వలె. వాండ్రు సాతిజి దనిజ్ ఇస్టమాతి వన్ని వెట పెండ్లి ఆదెజ్ ఆనాద్ గాని వాండ్రు ప్రబుజ్ సెందితికాన్ ఆజి మండ్రెజ్ వలె.

40 అది రాండిణి లెకెండెనె మహిజ ఒదె సర్దదాన్ మండ్రెజ్ ఆనాద్ ఇజి నాను ఒడిఃబిజిన, నజిబా దేవుణు అత్తు మంజి నాను ఒడిఃబిని దని లోఇ నజి నడిఃపిస్నాన్ ఇజి నాను ఒడిఃబిజిన.

## 8

**బొమ్మెజి పూజి సితమని బోజనం వందిజ్**

1 ఏలు బొమ్మెజి పూజి సిత బోజనం వందిజ్ వెహ్సిన. మాటు విజెటె గెణం మనికాట్ ఇజి నెసినాట్. గాని అయా లెకెండె మని గెణం పొజిస్సినాద్. గాని మా లిఇ ఒరెన్ వన్నిజ్ మరి ఒరెన్ వెట ప్రేమ మహిజ దేవుణు ముస్కు మని నమకమ్ దు పిరిపైజ్ అట్వాట్.

2 ఎయెన్ బా, నాను ఇనికాదొ నెస్సికాన్ ఇజి ఒడిఃబితిజి, వాండ్రు నెస్సెజ్ మని లెకెండె ఇనికబా నెస్సికాన్ ఆఎన్.

3 గాని దేవుణుడిజ్ఞ ప్రేమినిని వన్నిజ్ఞ దేవుణుడిజ్ఞ సెందితి వన్ని లెకెండ్ వాండ్రు సుణాన్.

4 అందెజె బొమ్మెజు పూజ సితికెజ్ తిని వందిజ్ఞ వెహ్సిన. ఉండ్రీ బొమ్మ ఇహిజు యా లోకమ్దు ఇనికబా అఇక ఇజి మాటు నెసినాట్. మరి దేవుణు ఒరెండ్రె మనాన్ మరి ఒరెన్ దేవుణు సెల్లెన్ ఇజి మాటు నెస్త మనాట్.

5 దేవుణు ఇజి కూకె అనికెజ్ ఇజి నండొ మహిజ్బా, నిజమె ప్రబుని దేవుణు ఇజి కూకె అనికెజ్ నండొ మన్నె. అగాసమ్దు గాని బూమి ముస్సు గాని దేవుణు ఇజి పేరు కూకె అనికెజ్ నండొ మన్నె.

6 గాని మజీ ఒరెండ్రె దేవుణు మనాన్, వాండ్రు మా బుబ్బు. వన్ని బాణిజె మనికెజ్ విజు కల్లితె. వన్ని వందిజ్ఞ మాటు బత్తిజినాట్. మజీ యేసు క్రీస్తు ఒరెండ్రె మా ప్రబు అతికాన్. మనికెజ్ విజు వన్ని వెటనె తయార్ అతె. వన్ని వెటనె మాటు బత్తినాట్.

7 గాని యాక విజెరె నెన్ఎర్. దేవుణుడిజ్ఞ నమ్మిత్తికార్ సెగొండార్ ఏలుబా బొమ్మెజ్ నిజమె దేవుణు ఇజి ఒండొబిజినార్. అందెజె వారు నని బోజనం కినివలె, నిజమె ఆక బొమ్మెజు పూజ సితికెజ్ ఇజి ఒండొబిజినార్. యాలెకెండ్ ఒండొబిజినె వారు ఉణార్. అందెజె వారు నని బోజనం కిత్తార్ ఇహిజు, వారు పాపం కిత్తార్ ఇజి పరి గర్బం గదిసి మంజినాద్.

8 గాని ఉణి బోజనమ్దాన్ మాటు దేవుణుడిజ్ఞ డగ్గు అదెజ్ అట్ఎట్. మాటు ఉణెఎండ మహిజు ఇనికాదొ గొప్ప విలువాతిక మజీ నస్టం ఆవద్. మాటు ఉటిజు ఇనికాదొ గొప్ప విలువాతిక మజీ లాబమ్బా మన్ఎద్.

9 అహిజు ఇనికబా కిదెజ్ నిజి మని అక్కుదాన్, మన్నుదు దయరం సిల్లి వరిజ్ తొరో ఇడ్ని లెకెండ్ మండ్రెజ్ ఆవద్.

10 ఎందనిజ్ఞ ఇహిజు, యా గెణం మని నీను, బొమ్మెజు మని గుడిడు బోజనం కిజి మంజినిక, మన్నుదు దయరం సిలికాన్ ఒరెన్ సుండొతిజు, బొమ్మెజు పూజ సితికెజ్ తిండ్రెజ్ వాండ్రు దయరం తపె ఆనాన్. అయాలెకెండ్ కిజి వన్ని గర్బం వన్నిజ్ఞ గదిసి మంజినాద్.

11 ఎందనిజ్ ఇహిజ, యా మన్సుదు దయరం సిలి వన్ని వందిజ్ బా క్రిస్తు సాత మనాన్. గాని, “నజీ గెణం మనాద్”, ఇజి తోరె ఆజిని నీను కిజిని పణిజాణిజ్ నీను వన్నిజ్ పాపం కిబిస్సి, మరి వన్నిజ్ పాడె: కిజిని.

12 యా లెకెండ్ మీరు, గర్బం గదిసిని, దయరం సిల్లి తంబెరిజ పడి:ఎండ పాపం కిజినిదెర్. ఎందనిజ్ ఇహిజ, నీను కిజిని పణిజ్ సుడె:జి తపు ఇజి ఒడె:బినికెజ్, వన్ని గర్బం గదిసినికెజ్ వాండ్రుబా కిజి మంజినాన్. యా లెకెండ్ మీరు క్రిస్తుజ్ పడి:ఇ పాపం కిజినిదెర్.

13 అందెజె నాను ఉణిజిని దనిదటాజ్ నా తంబెరి ఒరెన్ తప్పి సొన్నినాన్ ఇహిజ, నా తంబెరి తప్పి సొన్ఎండ మండ్రెజ్ ఇజి నాను ఎసెజ్ బా నన్ని కండ తిన్ ఏ.

## 9

### అపొస్తుడు ఆతి వన్నిజ్ మన్ని అక్కుజ్

1 నాను అక్కు మనికాన్ ఆవినా? నాను అపొస్తుడు ఆవినా? మా ప్రబు ఆతి యేసుజ్ తోవినా? మీరు, ప్రబు వందిజ్ నాను కిత్తి పణిదిజ్ పంట ఆఇదెరా?

2 నాను అపొస్తుడు ఇజి మహికార్ ఒడె:బిఎండ మహిజ్ బా, నిజమె మీ వందిజ్ నాను అపొస్తుడునె. నాను ప్రబు వందిజ్ అపొస్తుడు ఇని దనిజ్ రుజుప్ మీరె.

3 నా ముస్సు తీర్పు కిని వరిజ్ ఎద్రు నాను నా వందిజ్ వెప్పినిక యాక.

4 మాపు దేవుణు మాటెజ్ నెన్ పిస్తి వరిబాన్ లొసి ఉండెజ్ తిండ్రెజ్ మజి అక్కు సిల్లెదా?

5 మహి అపొస్తురుజ్ లెకెండ్ ని, ప్రబు తంబెరిజు ఆతివరి లెకెండ్ ని, పేతురు లెకెండ్ నమ్మిత్తికాద్ ఆతి ఆల్ని వెట బుల్లెయ్ కిదెజ్ మజి అక్కు సిల్లెదా?

6 దేవుణు పణి కిజిని మహివరి లెకెండ్, మాపు దేవుణు పణి కినివలె నజిని బర్షబెజ్ తిండి వందిజ్ పణి కిఎండ ఉణిజి తిండ్రెజ్ అక్కు మనాద్.

7 వన్ని సొంత డబ్బు కర్చు కిజి ఎయెన్బా సయ్నమ్దు పణి కినాంత్రా? ద్రాక్కు టోట ఉణుసి దని పట్టు తిన్ఇకాన్ ఎయెన్బా మనాంత్రా? గొర్రెజు పొస కిజి వన్నా పాలు ఉణిఇకాన్ ఎయెన్బా మనాంత్రా? ఎయెర్బా మన్ఎర్.

8 యా మాటెజ్ నాను లోకమ్దిజ్ సెందితి వరి వజనె వెహ్ఎ. దేవుణు సిత్తి రూలుదుబా యా లెకెండెనె వెహ్సినాద్.

9 “కలమ్దు మటిసిని డాను మూతుదు కిమా తోహ్మాట్”, ఇజి మోసె వెట దేవుణు సిత్తి రూలుదు రాస్త మనాద్. దేవుణు డాకు వందిజ్నె విసారిస్సాంత్రా?

10 నిజమె, యాక మా వందిజ్బా వెహ్ఎతాంత్రా? మా వందిజ్ వెహ్కెజె. ఎందనిజ్ ఇహిజు, పంట పంటితిజు, ఉండెజ్ ఆనాద్ ఇజి ఉండ్రీ ఆసదాన్ డూనికాన్ డూజినాన్. మటిసినికాన్బా అయ ఆసదాన్ మటిసినాన్.

11 మీ వందిజ్ ఆత్మదిజ్ సెందితికెజ్ మాపు మీ నడిమి వితాప్ ఇహిజు, అందెజ్ మీ బాణిజ్ మా ఒడొల్దిజ్ కావాలిక్కికెజ్ మాపు లొసె ఆతిజు ఆక పెరి సజతినా?

12 మీ బాణిజ్ సాయం లొసె ఆదెజ్ మహి వరిజ్ అతికారం మనాద్ ఇహిజు, మజీ వరిజ్ ఇంక ఒద్దె అక్కు సిల్లెదా? గాని మాపు యా అతికారమ్దిజ్ వాడెదెజ్ సిల్లెద్. అక్కాదె అఎండ క్రిస్తు సువార్దదిజ్ ఇని అడ్డుబా రెఎండ మండ్రెజ్ ఇజి విజు వన్నాజ్ బరిస్తాప్.

13 దేవుణు గుడిడు పణి కిజిని వరిజ్ దేవుణు గుడిడాన్ బోజనం దొహ్కాద్. పూజ సీని మాల్లి పీటదు పణి కిజిని వరిజ్ పూజ సిత్తి వన్నా లొఇహాన్ వంతు మనాద్ ఇజి మీరు నెన్ఇదెరా?

14 అయా లెకెండెనె సువార్త వెహ్సినె వరిజ్ బత్కుదిజ్ కావిలిస్తికెజ్ సువార్తదానె దొహ్కెకెజ్ ఇజి ప్రబు ఆడ్ర సిత్తా మనాన్.

15 గాని నాను ఇహిజు యా అతికారం లొఇ ఇనికబా వాడెఎత. మీరు యా లెకెండె నజీ కినిదెర్లె ఇని ఆసదాన్ ఇక రాన్ఎత. నాను పొగ్డె: ఆజి వెహ్సె యా మాటెజ్ ఎయెన్బా ఇని అర్థం సిల్లెండ కిని దనిజ్ ఇంక నాను సాతిజానె నెగెద్.

16 అహిజు, నాను సువార్త సాటిసిన ఇజి పొగ్డె: ఆదెజ్ నజీ అక్కు సిల్లెద్. ఎందనిజ్ ఇహిజు సువార్త సాటిస్సెజ్ ఇజి ఉండ్రీ బలవంతం నా



లోక మనాద్. సువార్త సాటిన్ఎండ మహిజ నజి బాద.

17 నా సొంత ఇస్టమ్దాన్ నాను సువార్త సాటిస్తిజ నజి జితం దొహ్కాద్. నా సొంత ఇస్టమ్దాన్ ఆవండ కిత్తిజ, నాను కిదెజ్ ఇజి నజి ఒప్పజెపె ఆతి పణి కిజిన ఇజి ఆజినాద్.

18 అహిజ నజి దొహ్కొ క్కి జితం ఇనిక? సువార్త సాటిసినివలె, నాను సువార్త సాటిసిని వరిజ్ మని అతికారమ్దాన్ ఇనికబా నా వందిజ్ గణస్తజ్ సుడఃఎండ, సెడ్డినె కిదెజ్ వలె. అక్కాదె నజి దొహ్కొ ఇనాయం.

19 నాను ఎయెరిజ్బా అడిఃగి మనికాన్ ఆవండ విజు దనిజ్ అక్కు మనికాన్. గాని, నజి అట్టి నసాండారిజ్ దేవుణు దరిజ్ కలపైజ్ ఇజి నానె నజి విజెరె వందిజ్ వెట్టిపణి కిని వన్ని లెకెండ కిబె ఆత.

20 యూదురిజ్ దేవుణు దరిజ్ కలపైజ్ ఇజి నాను వరి వందిజ్ యూదురు లోకు లెకెండ ఆత. నాను మోసె రాస్తి రూలుజ అడిఃగి మన్ఇకాన్ ఆతిజ్బా మోసె రాస్తి రూలుజ్ లొజిని వరిజ్ దేవుణు దరిజ్ కలపైజ్ ఇజి వరివందిజ్ మోసె రాస్తి రూలుజ్ లొజితి వన్ని లెకెండ ఆత మన.

21 దేవుణు మోసె సితి రూలుజ్ లొజిఇ వరిజ్ దేవుణు దరోట్ కుడుఃపైజ్ ఇజి నాను వరి లెకెండ ఆత. దేవుణు మోసె వెట సితి రూలుజ్ నాను లొజిఎ ఇజి నాను వెహ్ఎ, గాని క్రిస్తు సిత్తి రూలుజ్ లొజిజి మంజిన.

22 సత్తు సిలి వరిజ్ దేవుణు దరిజ్ కుడుఃపైజ్ ఇజి నాను సత్తు సిలి వన్ని లెకెండ ఆత. ఎలాగ ఆతిజ్బా సెగొండారిజ్ దేవుణు రక్కిస్తి లెకెండ కిదెజ్ ఇజి నాను విజెరె వందిజ్ ననివరి లెకెండ ఆత మన.

23 ఎందనిజ్ ఇహిజ దేవుణు బాణిజ్ వాజిని దినమ్క వందిజ్ సువార్త సాటిసిని నజిబా వంతు మండ్రెజ్ ఇజి యాకెజ్ విజు నాను సువార్త వందిజ్ కిజిన.

24 పందెం పొటిదు ఉహ్కొ పందెమ్దు ఉహ్కొనార్ విజెరె ఉహ్కొనార్ గాని ఒరెన్ వన్నిజె ఇనాయం దొహ్కాద్ ఇజి మీరు నెన్ఇదెరా? అందెజె ఇనాయం దొహ్కెజ్ ఇజినె మీరు పందెమ్దు ఉహ్కొ.

25 పందెమ్మదు పోటీ ఆనికార్ విజెరె దనివందిజ్ ఒజ ఆజి తయార్ అజినార్. సాణెం మంజి పాడే ఆజి సాన్సిని టోపి దోహక్కి వందిజ్ యాకెజ్ విజు కిజినార్. గాని మజి ఎలాకాలం మంజిని టోపినె దోహక్పాద్.

26 అందెజె నాను గురి సుడేఎండ ఉహక్కికాన్ ఆవ. నాను ముటి అసి గాలిదిజ్ డెయ్ని నని వన్ని లెకెండ్ ఆవ.

27 గాని మహి వరిజ్ సువార్త సాటిసి వెనుక, ఇనాయం దోహక్కిజి వన్ని లెకెండ్ నజి నానె కిఎండ మండ్రెజ్ ఇజి నా ఒడోల్దిజ్ నెగెండ అడ్డిజి, నజి వెట్టిపణి కిని వన్ని లెకెండ్ కిజిన.

## 10

ఇస్రాయేలు లోకురిజ్ సుడేజి నెస్తెజ్ మన్నికెజ్.

1 తంబెరిజాండె, మా అని గొగొర్ ఆతి యూదరు విజెరె మోసె వెట మహివలె ఇనిక జర్గిత మనాద్ మీరు నెగెండ నెని మండ్రెజ్ ఇజి నాను ఆస ఆజిన. దేవుణు వరివెట మనాన్ ఇజి ఉండ్రె గుర్తు లెకెండ్ దేవుణు వరి మున్కు ఇడ్డి మని మొసాప్ అడిగి వారు నడిత మహార్. ఎరాని సమ్దారం ఇని సమ్దారం నడిమిహాన్ వారు విజెరె వస్త్రా బూమిదాన్ అతాహ పడక నడిత సాహార్.

2 వారు విజెరె మోసె వెట మొసాప్ అడిగి మంజి సమ్దారం నడిమిహాన్ వస్త్రా బూమిదాన్ నడిజి మహిజ్, మోసె వెట బాప్తిసం లాగె ఆతి లెకెండ్ అతార్. ఎందనిజ్ ఇహిజు వారు మోసెజ్ వరిజ్ నెయ్యి లెకెండ్ వారు ఒప్పుకొటార్.

3 విజెరె దేవుణు సీతి ఉండ్రె బోజనమ్నె ఉటార్.

4 వారు విజెరె సట్టుదాన్ దేవుణు రప్పిసి ఉండ్రె ఏరునె ఉటార్. అయ సటు క్రీస్తుజ్ గుర్తు లెకెండనె మనాద్. ఎందనిజ్ ఇహిజు వాండ్రు ఇనికబా తకు సిల్లెండ వరిజ్ కావాలిస్తెకెజ్ విజు సీజి నిజమె వరి వెట నడిజి మహాన్.

5 అయా లెకెండ మహిజ్బా, వరి లోఇ నండోడారిజ్ దేవుణు ఇస్టం ఆవండ ఆతాన్. అందెజె ఎయెర్బా మన్ఇ అయా అడివిదు వరిజ్ సప్త విసీర్తాన్.

6 ఇక్కెజ్ విజు మాటు నెస్తెజ్ ఇజి మజి ఉండ్రీ గుర్తు లెకెండ వరిజ్ జర్గితె మన్నె. వారు సెఇ వనకాజ్ వందిజ్ ఆస ఆతి లెకెండ మాపు ఆస ఆవిండ జాగర్త మండ్రెజ్ ఇజి.

7 వరి లొఇ సెగొండార్ లెకెండ బొమ్మెజు మాడిఃసినికార్ ఆమాట్. “లోకుర్ తిండ్రెజ్ ఉండ్రెజ్ బస్తార్, కర్ణిదెజ్ నీజితార్”, ఇజి వరి వందిజ్ దేవుణు మాటదు రాస్త మనాద్.

8 వరి లొఇ సెగొండార్ కిత్తి మహి లెకెండ మాటు రంకు బూలమాట్. ఉండ్రె రొజుదు ననికార్ ఇరువయ్మాండ్రీ వెయుజ్ లోకుర్ సాతార్.

9 వరి లొఇ సెగొండార్ కిత్తి మహి లెకెండ మాటు ప్రబుజ్ పరిస కిదెజ్ ఆవద్. ననికార్ సరాస్ వైట సాతార్.

10 వరి లొఇ సెగొండార్ దేవుణు ముస్కు సణిజితార్. వారు నాసనం కినికాన్ ఆతి దేవుణు దూత వెట సాతార్. మాటు దేవుణు ముస్కు సణిజితార్ ఆవద్.

11 మహివరిజ్ తోరదెజ్ ఉండ్రీ గుర్తు లెకెండ యాకెజ్ వరిజ్ జర్గితె. యా తరమ్ది ఆకర్ దినమ్దు బత్తిజిని మజి బుద్ది వాదెజ్ ఇజి గెపతం కిత్తి మని లెకెండ రాసి ఇడెః ఆత మనాద్.

12 అందెజె ఎయెన్బా దేవుణు ముస్కు మని నమకమ్దు నాను గటిజు నిల్సిన ఇజి ఒడఃబితిజు, వాండ్రు వెటనె పాపమ్దు అర్ఎండ జాగర్త మండ్రెజ్ వలె.

13 మాములుక లోకురిజ్ వాజిని పరిక్సెజ్నె ఆవిండ మరి పెరికెజ్ ఇనికెజ్బా మిజి రవుతె. దేవుణు నమ్మకమాతికాన్. అందెజె ఓరిస్తెజ్ అట్టి దనిజ్ ఇంక పెరిక ఇనికబా మిజి వాదెజ్ వాండ్రు ఒప్వన్. అక్కాదె ఆవిండ వాజిని పరిక్సెజ్ నిల్సి మండ్రెజ్ పరిక్సె వెట తప్రె ఆదెజ్ ఉండ్రీ సరిబా తోరిస్నాన్లె.

**దెయమ్క పండ్రెయ్ని ప్రబు ఏర్పాటు కిత్తి బోజనం**

14 అందెజె నజి ఇస్టమాతి తంబెరిజాండె, బొమ్మెజు మాడిఃసిని బాణిజ్ దూరం ఉహ్కె మండ్రు.

15 మీరు నెగ్గి బుద్ది మనికిదెర్ ఇజినె నాను వర్గిజన. నాను వెప్పిని సజతిజు మీరె అర్లం కిజి సుడఃదు.

16 మాటు విజెట్ కూడఃజి వానివలె, మాటు దేవుణు ఏర్పాటు కిత్తి బోజనం ఉణువలె, దేవుణుదిజ్ వందనమ్కు వెప్పి గినాదిక ఉణిజి, మాటు ఉండ్రె రొటె రుక్సి తినివలె క్రీస్తు నలదాన్ మజి వాజిని నెగ్గి వన్యాజ్ కూడఃజి మంజినికాట్ ఆజినాట్.

17 రొటె ఉండ్రెనె, అయ ఉండ్రె రొటెదునె మాటు విజెట్ కూడఃజి తింజినాట్. అందెజె నండొండార్ ఆతి మాటు ఉండ్రె ఒడొల్ ఆత మనాద్.

18 ఇస్త్రాయేలు లోకురిజ్ సుడఃదు, దేవుణుదిజ్ సంద సుర్ని బాడ్డిదు సంద సీని వన్యాజ్ తినికార్, దనివెట కూడఃజి మంజినికార్ ఆవరా?

19 అందెజె బొమ్మెజి పూజ సితి వనకాజ్ లొఇ ఇనికబా మనాద్ ఇజినొ, బొమ్మెజి లొఇ ఇనికబా మనాద్ ఇజినొ నాను వెప్పినానా?

20 సిల్లెద్. గాని దేవుణు లోకుర్ ఆఇకార్ పూజెజ్ సీనివలె దేవుణుదిజ్ పూజ సీనినార్ ఇజి వారు ఒడఃబిజినార్. గాని నిజమె వారు దెయమ్కాజ్నె పూజ సీజినార్. అందెజె మీరు దెయమ్క వెట కూడఃజి మంజినిక నజి ఇన్టం సిల్లెద్.

21 మీరు ప్రబు గినాదాన్ ఉణిజి మరి దెయమ్క గినదాన్బా ఉండెజ్ అట్ఇదెర్. ప్రబు ఏర్పాటు కిత్తి బోజమమ్దుని దెయమ్క బోజనమ్దుబా ఒర్నె కూడఃజి మండ్రెజ్ అట్ఇదెర్.

22 దేవుణుదిజ్ సెందితి గవరం తగ్గి లెకెండె వన్నిజ్ సీదెజ్ వలె. అయా లెకెండె కిఎండె ప్రబు కోపం రేపిస్తెజ్ మాటు పణి కిజినాటా? మాటు వన్నిజ్ ఇంక సత్తు మనికాటా? నమ్మిత్తి వన్నిజ్ మని అక్కుజ్

23 “విజు వన్యా వందిజ్ నజి అక్కు మనాద్”, గాని విజు పణిదిజ్ వానికెజ్ ఆఉ. “విజు వనక వందిజ్ నజి అక్కు మనాద్”, గాని విజు నెగెండె పిరిప్పికెజ్ ఆఉ.

24 ఎయెన్బా నజి నానె నెగెండె మండ్రెజ్ ఇజి తొఎండె మహికార్బా నెగెండె మండ్రెజ్ ఇజి సుడఃదెజ్వలె.

25 మీ గర్బం మిజి గదిన్ఎండె మహిజ సతాదు పొర్ని ఇని కండబా తిండ్రు.

26 ఎందనిజ్ ఇహిజ, “యా బూమి ప్రబుదినె, దని మున్కు మనికెజ్ విజు వన్నివినె”, ఇజి దేవుణు మాటదు రాస్త మనాద్.

27 ఒరెన్ నమ్మిఇకాన్ మిజి విందుదిజ్ కూక్కి తనివలె, మిజి ఆస మహిజ సొండ్రు. గాని గర్బం గదిన్ఎండ, మి ఎదు ఇడ్డికెజ్ ఇనికబా వెన్బాఎండ తిండ్రు.

28 గాని ఎయెన్బా, “యాక బొమ్మెజ పూజ సితీ దనిబాణిక”, ఇజి వెహ్తిజ, వెహ్తి వన్ని వందిజ్ని మీ గర్బం గదిసిని వందిజ్ అక తిన్మాట్.

29 గర్బం గదిసిని వందిజ్ ఇజి వెహ్ని వలె అక్క నీది ఆవద్, వెహ్తివన్ని వందిజ్నె వెహ్నిన. విజు వన్కా వందిజ్ మజి మని అక్కుదిజ్ మరి ఒరెన్ వన్ని గర్బమ్దు మని ఆలోననమ్దాన్ ఎందనిజ్ మాపు తీర్పు కిబె ఆదెజ్?

30 నాను అయా బోజనం వందిజ్ దేవుణుదిజ్ వందనమ్కు వెహ్ని ఉటిజ, దేవుణుదిజ్ వందనమ్కు వెహ్ని ఉటి బోజనం వందిజ్ ఎందనిజ్ నాను దూసె ఆదెజ్ వలె.

31 అందెజె మీరు ఉటిజ్బా, తిహిజ్బా, ఇనిక కిత్తిజ్బా విజు దేవుణుదిజ్ గొప్ప పేరు వాని లెకెండ్నె కిదు.

32 యూదురిజ్ గాని, యూదురు ఆఇవ వరిజ్ గాని, దేవుణు సజమ్ది వరిజ్ గాని తొరొడ్డి లెకెండ్ ఇనికబా కిఎండ మండ్రు.

33 నండొండారిజ్ దేవుణు రక్కిస్తెజ్ ఇజి, నాను నజి నానె నెగెండ్ మండ్రెజ్ ఇజి తొవ. గాని మహికార్బా నెగెణ్ మండ్రెజ్ ఇజి విజు వన్కా లొఇ విజెరిజ్ సర్ద కిబిన్సి లెకెండ్ నాను మంజిన. మీరుబా నాను కిజిని లెకెండ్ కిజి మండ్రు.

## 11

దేవుణుదిజ్ పొగిడిజి మాడిస్సిక

1 నాను క్రిస్తుజ్ పొలిసి నడిసిని లెకెండ్ మీరు నజి పొలిసి నడిదు.

2 నాను మిజి నెన్పిన్సి బోదదిజ్ డిస్ఎండ లొజిజి నడిజినిదెర్ ఇజి, మరి విజు సజతిజ వందిజ్ నజి ఎత్తు కిజిని వందిజ్ నాను మిజి పొగిడిజిన.

3 ఏలు మీరు ఇక్కోజ్ నిజం నెస్తెజ్ ఇజి కోరిజిన. ఒరెన్ వన్నిజ్ బుర్ర క్రిస్తు, ఉండ్రి బోదెలిదిజ్ బుర్ర మొగకొడొః. క్రిస్తుజ్ బుర్ర దేవుణు ఇజి మీరు నెసి మండ్రెజ్.

4 ఎమేణి మొగకొడొఃబా పార్లనం కినివలెనొ, దేవుణు ప్రవక్త లెకెండ్ వర్గిని వలెనొ వన్ని బురాదు టుకుర్ ఇడ్డి మహిజ వాండ్రు వన్ని నెయ్యి. క్రిస్తుజ్ గవరం సొన్పిస్తాన్.

5 మరి ఎమేణి బోదెల్బా పార్లనం కినివలెనొ, దేవుణు ప్రవక్త లెకెండ్ వెప్పివలెనొ బురాదు టుకుర్ ఇడ్ఃఎండ మహివలె అది దని బుర్ర బోడిః కిబె ఆతి లెకెండ్ సిగు లాగె ఆజినాద్.

6 ఉండ్రి బోదెలి బురాదు టుకుర్ ఇడ్ఃఎండ మహిజ అది దని బుర్రది కొపు కత్రిస్తెజ్ వలె. కొపు కత్రిస్తెజ్నొ బోడి బుర్ర ఆదెజ్నొ సిగు ఆతిజ అది బురాదు టుకుర్ ఇడ్ఃదెజ్వలె.

7 మొగకొడొః బురాదు టుకుర్ ఇడ్ఃదెజ్ అక్కర్ సిల్లెద్. ఎండనిజ్ ఇహిజ దేవుణు, వన్ని గవరం తొరిస్తెజ్ ఇజి మొగవన్నిజ్ వన్ని మూర్తి లెకెండ్ తయార్ కిత మనాన్. గాని బోదెలి బురాదు టుకుర ఇడ్ఃదెజ్ వలె. ఎండనిజ్ ఇహిజ బోదెలి దని మాసిజ్ గవరం తొరిసినాద్.

8 ఎండనిజ్ ఇహిజ బోదెలి మొగకొడొః బాణిజ్ తయార్ కిబె ఆత మనాద్, గాని మొగకొడొః బోదెలి బాణిజ్ తయార్ కిబె ఆవతాన్.

9 అక్కాదె ఆవండ, దేవుణు బోదెలి వందిజ్ మొగకొడొఃదిజ్ తయార్ కివతాన్, గాని మొగకొడొః వందిజ్నె బోదెలిదిజ్ తయార్ కిత్తాన్.

10 అందెజె యా సజతి వందిజ్ని దేవుణు దూతార్ వందిజ్ అతికారమదిజ్ అడిఃగి మని దనిజ్ గుర్తు లెకెండ్ బోదెలి బురాదు టుకుర్ ఇడ్ఃదెజ్ వలె.

11 గాని ప్రబు వెట కూడిఃతి మని బత్కుదు బోదెలి మొగకొడొః వెట సమందం సిల్లెండ మన్ఎద్. మొగకొడొః బోదెలి వెట సమందం సిల్లెండ మన్ఎన్.

12 మొగకొడొః బాణిజ్ బోదెలి వాతి లెకెండ్నె బోదెలి బాణిజ్ మొగకొడొః పుట్టినాన్. గాని విజు దేవుణు బాణిజ్నె వాజినె.

13 ఉండ్రి బోదెలి బురాదు టుకుర్ ఇడ్ఃఎండ దేవుణుదిజ్ పార్లనం కిదెజ్ తగ్నాదా? మీరె ఒడిఃబిదు.

14 మొగ్గ కొడోః వన్ని బుర్రది కొపు పిరిప్తి మహిజ అక్క వన్నిజ్ సిగు ఇజి ఎయెర్ బా వెహ్ ఎండ మిజి మీరె నెస్సిదెర్ గదె.

15 గాని ఉండ్రీ బోదెలిదిజ్ బుర్రది కొపు పిరితి మహిజ అక్క దనిజ్ ఉండ్రీ పేరు మని లెకెండెనె, ఉండ్రీ పాత సెంగు లెకెండెనె.

16 దిన్ని వందిజ్ ఎయెన్ బా గొడఃబ రేప్తిజ ఇక్కాదె ఆవిండ మా లొఇ వేరె అలవాటు ఇనికబా సిల్లెద్. దేవుణు సజమ్ దుబా సిల్లెద్.

**ప్రబు ఏర్పాటు కిత్తి బోజనం వందిజ్.**

17 మరి ఏలు నాను వెహ్ పిని మాటదు మీరు నెగ్గికార్ ఇజి నాను మిజి పొగ్డిఃవ. ఇనిక ఇహిజ మీరు నెగ్గిదని వందిజ్ నె కూడఃజి వాజనిదెర్ గాని నెగ్గి దన్నిజ్ ఇంక అక్క సెఇక కిజినాద్.

18 మొదొహి సజతి ఇనిక ఇహిజ దేవుణు సజం లెకెండ మీరు కూడఃజి వానివలె మీ లొఇ గుంపుజ్ మన్నె ఇజి నాను వెహమన. యాక కండెక్ నిజమ్ నె ఇజి నాను నమ్మిజన.

19 దేవుణు ఎద్రు నెగ్గికార్ ఎయెర్ ఇజి తోరె ఆదెజ్ మీ లొఇ బేదమ్ కు తవ్ ఎండ మంజినె.

20 మీరు విజిదెరె కూడఃజి వానివలె మీరు ఉణిక ప్రబు ఏర్పాటు కిత్తి బోజనం ఆవెద్.

21 ఎందనిజ్ ఇహిజ, బోజనం కినివలె ఎయెర్ వందిజ్ బా కాప్ కిఎండ ఒరెన్ ఒరెన్ ముజాల బోజనం కిజినాన్. ఒరెన్ బజ సానాన్ మరి ఒరెన్ సొసి మంజినాన్.

22 ఆహె ఉండెజ్ తిండెజ్ మిజి ఇల్కు సిలునా? మరి దేవుణు సజమ్ దిజ్ ఇజిరె కణక సుడఃజి ఇనిక సిల్లి వరిజ్ మీరు సిగు కిజినిదెరా? నాను మీ వెట ఇనిక వెప్తాజ్? దిన్ని వందిజ్ నాను మిజి పొగ్డిఃదెజ్ నా? కసితం నాను పొగ్డిఃవ.

23-24 ప్రబు బాణిజ్ నజి దొహ్ క్తిక నాను మిజి ఒపజెప్తిక ఇనిక ఇహిజ, ప్రబువాతి యేసు వాండ్రు ఒపజెపె ఆతి పొదొయ్, ఉండ్రీ రొటె పెర్ది దేవుణుదిజ్ వందనమ్ కు వెహ్ పి దనిజ్ ముక్కెజ్ కిజి, “ఇక్క మీ వందిజ్ సీజిని నా ఒడోఃల్. నజి ఎత్తు కిజి యా లెకెండ కిజి మండ్రు”, ఇజి వెప్తాన్.

25 అయా లెకెండనె బోజనం కిత్తి వెనుక వాండ్రు ద్రాసకాలు మని గిన్నపెర్జి, “యా గిన్న నా నలదాన్ కిజిని కొత్త బపుమానం, మీరు యా గిన్నదిక ఉణి ఎస్తివలెబా నజీ ఎత్తు కిజి యా లెకండ కిజి మండ్రు”, ఇజి వెప్టాన్.

26 అందెజె మీరు యా రొట్టె తింజి యా గినాది ద్రాసకాలు ఉణి ఎస్తివలెబా ప్రబు మర్జి వానిదాక వన్ని సాపుదిజ్ సాటిసినిదెర్.

27 అందెజె ఎయెన్బా తగ్గికాన్ ఆవండ ప్రబు ఏర్పాటు కిత్తి బోజనమ్దు రొట్టె తింజి గినాదిక ఉటిజ, వాండ్రు ప్రబు ఒడోల్దిజ్ వన్ని నలదిజ్ పడిఎండ పాపం కినికాన్ ఆజినాన్.

28 అందెజె రొట్టెని గినాదిక ఉణి ముజాల్ ఒరెన్ ఒరెన్ వన్నిజ్ వాండ్రె నాను తగ్గికాండ్రా ఇజి సుడె: ఆదెజ్ వలె.

29 గాని ఎయెన్బా యాక ప్రబు ఒడోల్ ఇజి నిజం నెన్ఎండ ఉణి తినికాన్ వన్ని ముస్కు వాండ్రె సిక్స తపె ఆని వందిజ్ ఉణిజి తింజినాన్.

30 అందెజె మీ లొఇ నండొండార్ సత్తు సిల్లికార్ని జబుజ్ మనికార్ ఆతార్. నండొండార్ సాత సొహార్.

31 గాని మజి మాట్ నెగెణ్సుడె: ఆతాట్ ఇహిజ దేవుణు తీర్పుదు రెఎండ తపై ఆతాట్మరి.

32 మాటు ప్రబు బాణిజ్ తీర్పు తీర్పె ఆతాట్ ఇహిజ, యా లోకమ్ది వరిజ్ సీని సిక్సాదు రెఎండ ప్రబు మజి బుద్ది వెహ్పి సిక్సాన్ దిదిజినాన్.

33 అందెజె నా తంబెరిజాండె, మీరు కూడేజి వాజి బోజనం కినివలె మహివరి వందిజ్ కాప్ కిదు.

34 మీరు కూడేజి వాజినిక సిక్సదిజ్ గురి ఆవండ మండ్రెజ్ ఇజి ఎయెరిజ్బా బజ కట్టిజ వాండ్రు వన్ని ఇండ్రొనె బోజనం కిదెజ్వలె. నాను వానివలె మరి మని సజతిజ వందిజ్ వెహ్పాలె.

## 12

దేవుణు ఆత్మ సీని వరమ్కు.



1 తంబెరిజాండె, దేవుణు ఆత్మ సీజిని వరమ్కాజ్ వందిజ్ మీరు నెగెండ నెసి మండ్రెజ్ ఇజి నాను కొరిజిన.

2 దేవుణుదిజ్ నమ్మిఎండ మహివలె, ఇనికాదొ ఉండ్రీ సత్తుదాన్ ఎయెండ్రొ మిజి నడిఃపిన్తి మహి లెకెండ్ మీరు సొన్ని వర్గిణ బొమ్మెజి మాడిఃసి మహిదెర్ ఇజి మీరు నెస్సిదెర్.

3 అందెజె, నాను మిజి వెహ్నినిక ఇనిక ఇహిజ, దేవుణు ఆత్మదాన్ వర్గిజినికాన్ ఎయెన్బా, “యేసు సయెప్ పొందితికాన్”, ఇజి వెహ్తాజ్నొ, దేవుణు ఆత్మదాన్ ఆవండ “యేసు, ప్రబు ఆత మనాన్”, ఇజి వెహ్తాజ్నొ అట్ఎన్.

4 దేవుణు ఆత్మ సీజిని వరమ్కు నండొ రకమ్కు మన్నె. గాని అయా ఉండ్రె దేవుణు ఆత్మనె విజు వరమ్కు సీజినాన్.

5 మరి దేవుణు వందిజ్ కిదెజ్ అట్టి పణిజ్ నండొ రకమ్కు మన్నె, గాని ఒరెండ్రె ప్రబు వందిజ్ మాటు విజెటె పణి కిజినాట్.

6 జర్గిని సజతిజ్ నండొ రకమ్దికెజ్ మన్నె. గాని విజు వన్కా లొఱ, మరి విజెరె లొఱ పణి కినికాన్ ఒరెండ్రె దేవుణునె.

7 విజెరిజ్ పణిదిజ్ వాని వందిజ్ ఇజి ఒరెన్ ఒరెన్ వన్ని వెట దేవుణు ఆత్మ కిజిని పణిజ్ తొరె ఆజినె.

8 ఎలాగ ఇహిజ, ఒరెన్ వన్నిజ్ దేవుణు ఆత్మదాన్ బుద్ది మని మాటెజ్ వెహ్తాజ్ వరం సీజినాన్. మరి ఒరెన్ వన్నిజ్ గెణం మని మాటెజ్ వర్గిదెజ్ అయా దేవుణు ఆత్మనె వరం సీజినాన్.

9 మరి ఒరెన్ వన్నిజ్ అయా ఆత్మనె దేవుణు మున్కు నమకం సీజినాన్. మరి ఒరెన్ వన్నిజ్ అయా దేవుణు ఆత్మనె జబుజాణి వరిజ్ నెగెండ్ కిదెజ్ వరం సీజినాన్.

10 మరి ఒరెన్ వన్నిజ్ బమ్మాతి పణిజ్ సత్తుని, మరి ఒరెన్ వన్నిజ్ దేవుణు బాణిజ్ వాజిని మాటెజ్ వన్ని ప్రవక్త లెకెండ్ వెహ్తాజ్, మరి ఒరెన్ వన్నిజ్ ఆత్మెజ్ ఎలాగ మర్తికెజ్ ఇజి నెస్టెజ్, మరి ఒరెన్ వన్నిజ్ ఆఱ ఆఱ బాసెజ్ వర్గిదెజ్, మరి ఒరెన్ వన్నిజ్ బాసెజ్ అర్దం కిజి నెస్టెజ్ దేవుణు ఆత్మ వరమ్కు సీజినాన్.

11 అయ ఉండ్రె దేవుణు ఆత్మనె వన్నిజ్ ఇస్టమాతి వజ ఒరెన్ ఒరెన్ వన్నిజ్ వరమ్కు సీబాజి సీజి యా పణిజ్ విజు కిజినాన్.

ఉండ్రె ఒడోల్ని నండో బాగమ్కు.

12 ఒడోల్ ఉండ్రెనె, గాని నండో బాగమ్కు కూడోజి తయార్ ఆత మనాద్. నండో బాగమ్కు కూడితికాదె గాని అవి కూడోజి ఉండ్రె ఒడోల్ ఆతి లెకెండెన్ క్రీస్తుబా మనాన్.

13 ఎలాగ ఇహిజ, యూదురు ఆతిజ్బా, యూదురు అఇకార్ ఆతిజ్బా, వెటి పణి కినికాన్ ఆతిజ్బా, అక్కు మనికాన్ ఆతిజ్బా మాటు విజెటి ఉండ్రె ఒడోల్దు ఉండ్రె ఆత్మదానె బాప్తీసం లాగె ఆతాట్. అయ ఉండ్రె దేవుణు ఆత్మదానె మా మన్సుజ దేవుణు మజీ సిత మనాన్.

14 ఒడోల్ ఇహిజ నండో బాగమ్కాణిజ్ తయార్ ఆతిక. ఉండ్రె బాగమ్దాన్ తయార్ ఆతిక అవద్.

15 అందెజె, “నాను కియు ఆఎ, అందెజె నాను ఒడోల్దు మనిక అఎ”, ఇజి పాదం వెప్తాజ, అక్కు ఒడోల్దు మంజినిక ఆవిండ ఆజినాదా?

16 మరి, “నాను కణక ఆఎ, అందెజె నాను ఒడోల్దు మనిక అఎ”, ఇజి గిబ్బి వెప్తాజ, అక్కు ఒడోల్దు మంజినిక ఆవిండ ఆజినాదా?

17 ఒడోల్ విజు ఉండ్రె కణకానె ఆతిజ, ఎలాగ విండ్రెజ్ అనాద్? ఒడోల్ విజు గిబ్బి ఉండ్రె ఆతిజ, వాసనం సూణిక ఎంబె మంజినాద్?

18 గాని ఉండ్రె ఉండ్రె బాగం ఎలాగ మండ్రెజ్నో, అయా లెకెండె దేవుణు వన్నిజ్ ఇస్టమాతి లెకెండె ఒడోల్దు ఇట్టా మనాన్.

19 ఆకెజ్ విజు ఉండ్రె బాగం ఆతిజ ఒడోల్ ఎంబె?

20 ఆకెజ్ మని లెకెండె నండో బాగమ్కు మన్నె గాని ఒడోల్ ఉండ్రె.

21 అందెజె, కణక కియుదిజ్, “నీను నజి అక్కర్ సిల్లెద్”, ఇజి వెప్తాజ్ అట్ఎద్. బుర్ర పాదమ్కాజ్, “మీరు నజి అక్కర్ సిల్లెద్”, ఇజి వెప్తాజ్ అట్ఎద్.

22 అక్కాదె ఆవిండ, ఒడోల్దు కూడితి మని సత్తు తకు ఆతి బాగమ్కాజ్, అక్కెజ్ మండ్రెజ్ అక్కర్ సిల్లెద్ ఇజి డిస్పిస్టెజ్ అట్ఎద్.

23 ఒడొలీదు ఎమేణి బాగమ్కాజ్ గవరం సిల్లికెజ్ ఇజి మాటు ఒడొబిజి నాటొ వన్కాజ్ మరి నండొ గవరం మని తెకెండ్ తయార్ కిజినాట్. సుడొదెజ్ సొకు తోరిఇ బాగమ్కాజ్ ఒద్దె అందం వాని లెకండ్ కిజినాట్.

24 ఒడొలీదు మని అందం మని బాగమ్కాజ్ మరి నెగెండ్ సుడొదెజ్ అక్కర్ సిల్లెద్. గాని దేవుణు విజు బాగమ్కాజ్ కుడుఃప్పి ఒడొలీదు ఇట్టివలె, మర్యాద తకు మని వనకాజ్ లావ్ మర్యాద సితాన్.

25 అందెజె ఒడొలీదు గొడొబెజ్ మన్ఎండ విజు బాగమ్కు ఉండ్రీ మరి ఉండ్రీ బాగం వందిజ్ నెగెండ సుడొజి మంజినె.

26 ఉండ్రీ బాగమ్దు కస్తం వాతిజు, బాగమ్కు విజు కూడొజి దని వెట కస్తమ్దు మంజినె. ఉండ్రీ బాగమ్దిజ్ గవరం దొహ్క్కి వలె, బాగమ్కు విజు దనివెట కూడొజి సర్ద అనె.

27 ఏలు, మీరు క్రీస్తు ఒడొలీ అతి మనిదెర్. ఒరెన్ ఒరెన్ ఉండ్రీ బాగం ఆత మనాద్.

28 మరి దేవుణు సజమ్దు ముజాల సెగొండొరిజ్ అపొస్తురు ఇజి, వెనుక మరి సెగొండొరిజ్ దేవుణు ప్రవక్తరు ఇజి, దని వెనుక సెగొండొరిజ్ దేవుణు మాటెజ్ నెస్పిసినికార్ ఇజి, దని వెనుక సెగొండొరిజ్ బమ్మాతి పణిజ్ కినికార్ ఇజి, దని వెనుక మనికార్ ఇజి, సెగొండొరిజ్ మహి వరిజ్ సాయం కినికార్ ఇజి, మరి సెగొండొరిజ్ నడిఃపిస్సికార్ ఇజి, మరి సెగొండొరిజ్ ఆఇ ఆఇ బాసెజ్ వర్గినికార్ ఇజి ఏర్పాటు కిత మనాన్.

29 విజెరె అపొస్తురునా? విజెరె దేవుణు ప్రవక్తరునా? విజెరె దేవుణు మాటెజ్ నెస్పిసినికార్నా? విజెరె బమ్మాతి పణిజ్ కినికారా?

30 విజెరె జబుజాణి వరిజ్ నెగెండ్ కిదెజ్ వరం మనికారా? విజెరె ఆఇ బాసెజాణిజ్ వర్గినికారా? విజెరె అయ బాసెజు అర్దం కిజి వెప్పినారా?

31 గాని వరమ్క లొఇ గొప్పు పెరి వన్కా వందిజ్ ఆస ఆజి మండ్రు. ఏలు నాను మిజి గొప్పు నెగ్గి సరి తోరిసినాలె.

# 13

## విజు దనిజ్ పెరిక ప్రేమ

1 నాను లోకుర్ వర్గిని విజు బాసెజాణిజ్ వర్గితిజ్బా, దేవుణు దూతార్ వర్గిని బాసెజాణిజ్ వర్గితిజ్బా, నాను ప్రేమ సిల్లికాన్ ఇహిజ పణిదిజ్ రెజ కంసు, సిల్లిజ టిజ్టిజ్ పలక్కి తాలిబిలెజ్ లెకెండ్నె.

2 నాను దేవుణు ప్రవక్త లెకెండ్ వరం మనికాన్ ఆతిజ్బా, డాజితి మని విజు సజతిజ్ నెస్తెజ్ అట్టికాన్ ఆతిజ్బా, విజు గెణం మనికాన్ ఆతిజ్బా, గొరొకాజ్ బస్లిసిని నమకం మనికాన్ ఆతిజ్బా ప్రేమ సిల్లికాన్ ఇహిజ నాను పణిదిజ్ రెజక.

3 నజి కల్లితి మనికెజ్ విజు బీద వరిజ్ సిత్తిజ్బా, సిసుదు సుర్దెజ్ నా ఒడొఱ ఒపజెప్తిజ్బా, ప్రేమ సిల్లికాన్ ఇహిజ నాను కినిక పణిదిజ్ రెజక.

4 ప్రేమ మనికాన్ నండొ ఓరిసినాన్. వాండ్రు మహి పరి ముస్కు దయ మనికాన్ ఆనాన్. వాండ్రు గోస ఆఎన్. వాండ్రు పొజిజినికాన్ ఆఎన్. వాండ్రు గర్ర ఆఎన్.

5 ప్రేమ మనికాన్ మర్యాద సిల్లెండ మనికాన్ ఆఎన్. వాండ్రు నజి నానె నెగెండ మండ్రెజ్ ఇజి ఒడొఱినికాన్ ఆఎన్. వాండ్రు బేగి కోపం ఆఎన్. వాండ్రు వన్ని వెట కిత్తిమని సెజ వన్కా వందిజ్ మన్నుదు ఇడొఱి మన్ఎన్.

6 ప్రేమ మనికాన్ సెజ వన్కా వందిజ్ సర్ద ఆఎండ, నిజమాతి వన్కా వందిజ్ సర్ల ఆజినాన్.

7 ప్రేమ మనికాన్ ఎస్తివలెబా సణిజిఎండ విజు సెమిస్సాన్. వాండ్రు ఎస్తివలెబా మహిపరి వందిజ్ నెగెకెజ్ నమ్మిజి మంజినాన్. వాండ్రు ఎస్తివలెబా ఆసదాన్ ఎద్రు సుడొఱి మంజినాన్. వాండ్రు ఎస్తివలెబా డిన్ఎండ ఓరిసి మంజినాన్.

8 ప్రేమ ఎలాకాలం మంజినాద్. దేవుణు ప్రవక్త లెకెండ్ వెప్తెజ్ మని వరం ఎలాకాలం మన్ఏద్. ఆఇ ఆఇ బాసెజ్బా వర్గినికబా ఎలాకాలం మన్ఉలె. గెణమ్బా సిల్లెండ ఆనాద్.

9 ఎందనిజ్ ఇహిజ ఏలు మాటు సెగమ్నె నెస్త మనాట్. సెగమ్నె దేవుణు ప్రవక్త లెకెండ్ వెప్పినాట్.

10 గాని పూర్తి ఆతిక వానివలె పూర్తి అజక నిల్లెండ ఆనాద్.

11 నాను ఇజిరికాన్ మహివలె ఇజిరి వన్ని లెకెండ్ వర్గిత. ఇజిరి వన్ని లెకెండ్ ఒడఃబిత. ఇజిరి వన్ని లెకెండ్ అలోసనం కిత. పెరికాన్ ఆతివలె ఇజిరికాన్ మహివలె మని పణిజ్ డిస్త సిత్త.

12 ఏలు అద్దమ్దు సుడిఃతి లెకెండ్ ఉండ్రీ బొమ్మనె సుడఃజినాట్. నస్తివలె మొకొం నిండ్రు సూణాట్. ఏలు సెగమ్నె నెస్సాట్, నస్తివలె దేవుణు నజీ ఏలు నెస్తిమని లెకెండ్ పూర్తి నెస్సాట్లె.

13 అహిజ దేవుణు ముస్కు మని నమకం, ఆసదాన్ ఎద్రు సుడఃజి మంజినిక, ప్రేమ యా మూండ్రీబా నిల్పి మంజినె. గాని వినుక లోఱ గొప్ప నెగ్గిక ప్రేమనె.

## 14

దేవుణు ఆత్మ సీని వరమ్కు.

1 మీ బత్కుదు ప్రేమనె ముజాల మనిద్. దేవుణు ఆత్మ సీజిని వరమ్కాజ్ వందిజ్ ఆస ఆజి మండ్రు. దేవుణు ప్రవక్తరు ఆదెజ్ ఆస ఆదు.

2 ఎందనిజ్ ఇహిజ, అజ బాసెజ వర్గినికాన్ లోకుర్ వెట ఆవిండ దేవుణు వెటనె వర్గిజినాన్. నిజమె లోకు ఎయెన్బా వాండ్రు వర్గినికెజ్ అర్దం కిదెజ్ అట్ఎన్. గాని వాండ్రు వన్ని ఆత్మదాన్ దేవుణుదిజ్ సందితి డాజితి మని సజతిజ్ వర్గిజినాన్.

3 గాని, దేవుణు ప్రవక్తరు లెకెండ్ వర్గినికాన్ లోకుర్ వెటనె వర్గిజినాన్. లోకుర్ మన్సుదు సత్తు మనికార్ ఆదెజ్, వరిజ్ దయరం వెప్టాజ్, మరి ఓదరిస్సెజ్ ఇజి.

4 అజ బాసెజ్ వర్గినికాన్ వన్నిజ్ వాండ్రె దయరం కిబె ఆజినాన్. గాని దేవుణు ప్రవక్తరు లెకెండ్ వర్గినికాన్ సజమ్దు మని వరిజ్ ఉసార్ కిజినాన్.

5 మీరు విజిదెరె ఆఇ బాసెజాణిజ్ వర్గినికిదెర్ ఆదెజ్ ఇజి నాను కోరిజిన. గాని దేవుణు ప్రవక్తరు లెకెండ ఆదెజ్ ఇజి లావ్ ఆస ఆజిన. ఆఇ బాసెజాణిజ్ వర్గినికాన్, సజమ్దిజ్ దయరం వెహైజ్ ఇజి ఆఇ బాసెజాణిజ్ వర్గిని మాటెజ అర్లం కిజి వెహ్ఎండ మహిజ, దేవుణు ప్రవక్తనె వన్నిజ్ ఇంక పెరికాన్ ఆజినాన్.

6 తంబెరిజాండె, నాను మీ డగ్రు వాజి, దేవుణుది డాజితి మని సజతిజ్ దేవుణు తోరిస్తికెజ్నో, గెణం మాటెజ్నో, దేవుణు ప్రవక్త లెకెండ దేవుణు సిత్తి మాటెజ్నో మీ వెట వర్గిఎండ, ఆఇ బాసెజాణిజ్ వర్గిజి మహిజ నా వెట మిజి ఇని లాబం వానాద్?

7 అయా లెకెండెనె, పలక్కివలె నెవుడుః వాజిని పాణం సిల్లి వస్తుజ్ ఆతి, టోయ్ల గాని పిరుడిః గాని పలక్కివలె ఇని తేడ సిల్లెండ ఉండ్రె లెకెండ పలక్కి మహిజ, ఊక్తి మనిక ఇనిక, పలక్తి మనిక ఇనిక ఇజి ఎలాగ నెస్సెజ్ ఆనాద్?

8 విదెమ్దిజ్ సాండ్రెజ్ ఇజి సయ్నమ్ది వరిజ్ కూక్తెజ్ జోడు బాంగ పలక్కివలె వరిజ్ అర్లమానిలెకెండ నెగెండ జాటు సిఎండ మహిజ, విదెమ్దిజ్ సాండ్రెజ్ సయ్నమ్దికార్ తయార్ ఆనారా?

9 అయాలెకెండెనె మీరుబా వెయుదాన్ నెగెండ వర్గిఎండ మహిజ, మీరు ఇనిక వర్గిజినిదెర్ ఇజి వినికార్ ఎలాగ అర్లం కిదెజ్ అట్నూర్? మీరు గాలి వెటనె వర్గినికిదెర్ ఆజినిదెర్.

10 యా లోకమ్దు నండో బాసెజ్ మన్నె ఇని దనిజ్ ఇని అనుమానం సిల్లెద్. గాని వన్నా లొఇ ఉండ్రెబా అర్లం సిల్లిక ఆవద్.

11 ఒరెన్ వర్గిని మాటెజ నాను అర్లం కిదెజ్ అట్ఎండ మహిజ, నాను వర్గిని వన్నిజ్ ఆఇ దేసెమ్ది వన్ని లెకెండ ఆనాలె. వర్గినికాన్ నజిబా ఆఇ దేసెమ్ది వన్ని లెకెండ మంజినాన్.

12 మిజిబా అయాలెకెండెనె మంజినాద్. మీరు దేవుణు ఆత్మ సీజిని వరమ్కాజ్ వందిజ్ నండో ఆస ఆజి మంజినికిదెర్. అందెజె సజమ్దిజ్ పిరిప్పి వందిజ్ అయా వరమ్కాజ్ నండో పణి కిదు.

13 అందెజె దిన్ని వందిజ్, ఆఇ బాసదాన్ వర్గినికాన్, బాసెజ అర్లం కిజి వెహైజ్ అట్టి లెకెండ పార్లనం కిదెజ్ వలె.

14 అహిజ, నాను ఆఇ బాసదాన్ పార్దనం కిజి మహిజ, నా ఆత్మ పార్దనం కిజినాద్. గాని నా గర్భం కాలి మంజినాద్.

15 అందెజె నాను ఇనిక కిదెజ్ వలె? నాను నా ఆత్మదాన్ పార్దనం కిన. గాని నా మన్సుదాన్బా నాను పార్దనం కినాలె. నాను నా ఆత్మదాన్ పాటెజ్ పార్పు. గాని నా మన్సుదాన్బా పాటెజ్ పార్పాలె.

16 మీరు మీ ఆత్మదాన్ దేవుణుదిజ్ పొగ్డిఃజి మహిజ, మీరు దేవుణుదిజ్ వందనమ్కు వెప్పినిదెర్. మీరు వర్గిని మాటెజ అర్దం కిదెజ్ అట్ఇకాన్ ఒరెన్, మీరు వెప్పిని వందనమ్దిజ్, ఎలాగ మీ వెట కూడఃజి, “ఆమెన్” వెప్తాజ్ అట్నాన్.

17 మీరు ఇహిజ ఒద్దె నెగెండ దేవుణుదిజ్ వందనమ్కు వెప్పినిదెర్. గాని ఆఇకాన్ దయరం కిబె ఆదెజ్ అట్ఎన్.

18 నాను మిజి విజెరిజ్ ఇంక నెగెండ ఆఇ బాసెజాణిజ్ వర్గిజిని వందిజ్ దేవుణుదిజ్ వందనమ్కు వెప్పిన.

19 గాని సజమ్దు ఆఇ బాసెజాణిజ్ పది వెయుజ్ మాటెజ్ వర్గిని దనిజ్ ఇంక మహివరిజ్ నెస్పిన్ని లెకెండ బుద్దిదాన్ కూడిఃతి అయ్దు మాటెజ్నె నాను వెహ్న.

20 తంబెరిజాండె, మీరు ఇజిరి కొడొఃర్ ఒడఃబిని లెకెండ ఒడఃబిజి మంజినిక డిఃసి సీదు. సెఇ వన్కా వందిజ్ లేత కొడొఃర్ లెకెండ మండ్రు. గాని ఒడఃబినిబాన్ పెరికిదెర్ ఆదు.

21 “ఆఇ బాసెజ్ వర్గిజిని ఆఇ దేసెమ్ది లోకుర్ నా వందిజ్ విరి వెట వర్గితిజ్బా వారు గిబిజ్ ఒడఃజి నా మటెజ్ వినవర్”, ఇజి ప్రబు వెప్పినాన్ ఇజి దేవుణు మాటదు రస్త మనాద్.

22 అందెజె ఆఇ బాసెజ్ వర్గినిక, సమ్మిఇ వరిజ్ దేవుణు సత్తుదిజ్ ఉండ్రీ గుర్తు లెకెండెనె మనాద్ ఇజి మాటు దేవుణు మాటదాన్ నెస్నాట్. సమ్మిత్తి వరిజ్ ఆవద్. గాని దేవుణు ప్రవక్తరు వెప్పిని మాటెజ్, సమ్మిత్తి వరి వందిజ్ రుజుప్ ఆజినె గాని సమ్మిఇ వరివందిజ్ ఆవద్.

23 అందెజె సజమ్దు మునికార్ విజెరె కూడఃజి వానివలె విజెరె ఆఇ బాసెజాణిజ్ వర్గిజి మహిజ, యాక అర్దం కిదెజ్ అట్ఇకానొ,

నమ్మింకానో లోక వాతిజా, మీరు బుద్ధి నెగెండ సిల్లెండ ఆజి వర్గిజనిదెర్ ఇజి వారు వెహ్‌వీరా?

24 గాని ఒరెన్ నమ్మింకాన్ గాని దిన్ని వందిజ్ నెన్‌కాన్ గాని లోక వాతిజ, విజిదెరె దేవుణు ప్రవక్తరు లెకెండ వెహ్ని మహిజ, వెని మాటెజాణిజ్ వాండ్రు కిత్తి మని తప్పుజ వందిజ్ ఎత్తు కిజి వన్ని మన్నుదు ఒడిబిజి ఒప్పుకొణాన్. మీరు వెహ్నిని మాటెజాణిజ్ వన్నిజ్ వాండ్రె తీర్పు కిబె ఆనాన్‌లె.

25 మరి వన్ని మన్నుదు డాజితి మనికెజ్ విజు వెల్లి తోర్నె. అయావలె, “నిజమె దేవుణు మీ వెట మనాన్”, ఇజి బమ్మ ఆజి వాండ్రు ముణుకుజ్ ఊర్‌జి దేవుణుదిజ్ పొగ్‌డిజి మాడిస్నాన్‌లె.

**దేవుణుదిజ్ పొగ్‌డిజి మాడిస్నిక ఎలాగ మండ్రెజ్.**

26 అహిజ తంబెరిజాండె, మాటు ఇనిక వెహ్జె? మీరు కూడజి వానివలె, ఒరెన్, ఉండ్రె పాటిజ్ పార్దెజ్ వలె ఇజినాన్. మరి ఒరెన్ బుద్ధి మాటెజ్ నెస్సిస్తెజ్ వలె ఇజినాన్. మరి ఒరెన్ డాజితి మనిక దేవుణు తోర్నికెజ్ వెహ్జెజ్ వలె ఇజినాన్, మరి ఒరెన్ ఆజ బాసెజాణిజ్ వర్గిదెజ్ వలె ఇజినాన్, మరి ఒరెన్ బాసదిజ్ అర్థం వెహ్జెజ్ వలె ఇజినాన్, యాకెజ్ విజు సజమ్‌దు మని వరిజ్ దయ్‌రం వాని వందిజ్ కిదెజ్‌వలె.

27 ఆజ బాసెజ వర్గినికార్ ఒరెనో రిఎర్‌నో వర్గిదెజ్ వలె. రిఎర్‌జ్ మిస్తిజ ముఎర్ వర్గిదెజ్ వలె. గాని విజెరె ఒర్నె వర్గిఎండ, ఒరెన్ ఒరెన్ వర్గిదెజ్ వలె. ఎయెర్‌బా దనిజ్ అర్థం వెహ్జెజ్ వలె.

28 ఆజ బాసెజ వర్గిని దనిజ్ అర్థం కిజి వెహ్నికాన్ సిల్లెండ మహిజ, ఆజ బాసెజాణిజ్ వర్గినికాన్ సజమ్‌దు పల్లక్ మండ్రెజ్. వాండ్రు వన్ని మన్నుదు వర్గిజి దేవుణు వెట వర్గిదెజ్ వలె.

29 దేవుణు ప్రవక్తరు లెకెండ వర్గినికార్‌బా రిఎర్‌నో, ముఎర్‌నో వర్గిదెజ్ ఆనాద్. మహికార్ వెహ్ని దనిజ్ నెగెండ వెంజి, ఇనిక వెహ్నినార్ ఇజి జాగర్త సుడెదెజ్‌వలె.

30 డగ్రు బస్తిమని మరి ఒరెన్ దేవుణు ప్రవక్తెజ్ ఇనికాబా దేవుణు బాణిజ్ తోరె ఆతిజ, ముజాల వర్గిజి మంజినికాన్ పలక్ మండ్రెజ్ వలె.



31 విజెరిజ్ నెస్పిసిని వందిజ్, విజెరిజ్ దయరం వెప్పి వందిజ్, మీరు విజెరిజ్ ఒరెన్ వన్ని వెనుక మరి ఒరెన్ దేవుణు బాణిజ్ వాజిని మాటెజ్ దేవుణు ఆత్మ నడిపిన్ని లెకెండ్ వర్గిదెజ్ ఆనాద్.

32 ప్రవక్తరు లొఇ మని వరి ఆత్మ ప్రవక్తరిజ్ లొజిజి మంజినాద్.

33 ఎండనిజ్ ఇహిజ దేవుణు సమాదానమ్దిజ్ దేవుణునె గాని గగోలిదిజ్ దేవుణు ఆవెన్.

34 విజు దేవుణు సజమ్కాజ్ మని లెకెండ్, సజమ్దు పొగడిజి మాడిస్సివలె, బోదెక్ గగోల్ అజి వర్గిజి మండ్రెజ్ ఆవద్, పలక్ మండ్రెజ్ వలె. సజమ్దు అవిక్ వర్గిదెజ్ ఆవద్. గాని మోసె రాస్తి రూలుదు వెప్తి మని లెకెండ్ అవిక్ అణిజిజి మండ్రెజ్.

35 వరిజ్ ఇనికబా నెస్టెజ్ ఇహిజ, ఇండ్రొ వన్కా వన్కా మాసిరిజ్ వెన్బాదెజ్ వలె. సజమ్దు బోదెలి వర్గిజి మంజినిక దనిజ్ సిగు.

36 మీరు ఇనిక ఒడెబిజనిదెర్? దేవుణు మాటెజ్ మీరె రాస్తి తయార్ కిత్తిదెరా? అక్క మిజినె అక్క దొహ్క మనాదా?

37 ఎయెన్బా వాండ్రు దేవుణు ప్రవక్త ఇజి ఒడెబిజినాన్ ఇహిజ, దేవుణు ఆత్మ సిత్తి వరమ్కు మనికాన్ ఇజి ఒడెబిజి మహిజ్బా, వాండ్రు నాను మిజి రాస్తి మనికెజ్ ప్రబుబాణిజ్ వాతి ఆడ్రెజ్ ఇజి తవ్వెండ ఒప్పుకోడెజ్ వలె.

38 ఎయెన్బా యాక నెక్కి పొక్తిజ, వన్నిజ్ వాండ్రె నెక్కి పొకె ఆనాన్లె.

39 అందెజె నా తంబెరిజాండె, దేవుణు ప్రవక్తరు ఆదెజ్ ఆస ఆజి మండ్రు. గాని ఆఇ బాసెజాణిజ్ వర్గిని వరిజ్ అడ్డు కిమాట్.

40 గాని విజుబా నెగెండ మర్యాదదాన్ తగ్ని లెకెండ్ కిదెజ్ వలె.

## 15

క్రీస్తు సాతి వరిబాణిజ్ మర్జి నిజితి వందిజ్.

1 తంబెరిజాండె, నాను మీ నడిమి సాటిస్తి సువార్త వందిజ్ మరి మిజి ఎత్తు కిబిస్టెజ్ ఇజి నాను కొరిజిన. మీరు డగ్రు కిజి నమ్మిత్తి అయ సువార్త, దన్నిజ్ తగితి లెకెండ్ మండ్రెజ్ ఇజి నిర్ణెం కిత్తిదెర్.

2 నాను మిజి వెప్టి మని అయా సువార్తదానె దేవుణు మిజి రక్సిస్త మనాన్. అందెజె నాను వెప్టి మని మాటెజ్, మీరు నెగెండ అసి అయాలెకెండెనె మండ్రెజ్. సిల్లెండ మహిజ మీరు దేవుణు ముస్కు ఇట్టి నమకం నిజం ఆవిండ మంజినాద్.

3 దేవుణు బాణిజ్ నజి దొహ్క్తి మన్నిక, నాను మిజి ఒప్పుజెప్తి మని వన్కా లొఇ గొప్పు ముకెలమతిక ఇనిక ఇహిజ, ముజాల దేవుణు మాటదు రాస్తి మహిక పూర్తి కిత్తి లెకెండ, క్రీస్తు మా పాపమక వందిజ్ సాతాన్.

4 ముజాల దేవుణు మాటదు రాస్తి మహిక పూర్తి కిత్తి లెకెండెనె మూసె ఆతండ్రె మూండ్రె రోస్కాణిజ్ మర్రి నీకె ఆతాన్.

5 ముజాల పేత్రుజ్ని\* వెనుక వన్ని సిసుర్ ఆతి పనెండు మన్సిరిజ్ తోరె ఆతాన్.

6 దన్ని వెనుక అయ్దు వందెజ మిస్తి నమ్మిత్తి తంబెరిజ ఒర్పె తోరె ఆతాన్. వరి లొఇ సెగెండార్ సాత సొహోర్ ఇహిజ్బా నండెండార్ ఏలుబా బత్కిజినార్.

7 వెనుక వాండ్రు యాకోబుజ్ని అపొస్తురుజ్ విజెరిజ్ తోరె ఆతాన్.

8 విజెరిజ్ తోరె ఆతి వెనుక, కడెవేరిదు, నెగెండ పుట్ఇకానాతి నజిబా తోరె ఆతాన్.

9 అపొస్తురు లొఇ విజెరిజ్ ఇంక వీన్కొడెః నానె. అపొస్తుడు ఇజి కూకె ఆదెజ్బా నాను తగితిక ఆవి. ఎందనిజ్ ఇహిజ నాను దేవుణు సజమది వరిజ్ హిమ్సెజ్ కిత మన్న.

10 ఏలు నాను ఇనిక ఆత మనానో, అక్క దేవుణు నజి తోరిస్తి దయాదర్మమదానె ఆత మన్న. అహిజ వాండ్రు నా ముస్కు దయా దర్మం తోరిస్తిక దర్మమదిజ్ సిత్తి లెకెండ ఆవెతాద్. విజెరిజ్ ఇంక నండో క్షబాడెఃజి నాను పణి కిత మన. గాని క్షబాడెఃతిక నాను ఆవి, నజి తోడుః మహి దేవుణు దయాదర్మమనె.

11 అందెజె నాను ఆతిజ్బా, వారు ఆతిజ్బా ఇక్కాదె మాపు సాటిస్త మనాప్.

\* 15:5 15:5 పేతురుజ్ కేప ఇజిబా పేరు మనాద్.

సాతికార్ మరజ నీజ్ని వందిజ్.

12 గాని, క్రీస్తు సాతి వరి బాణిజ్ నీకె ఆత మనాన్ ఇజి సాటె ఆతి మహిజ్, సాతి వరి బాణిజ్ మరజ నిజ్నిక సిల్లెద్ ఇజి మీ లొఇ సెగొండార్ ఎలాగ వెహ్సినార్?

13 సాతి వరిబాణిజ్ మరజ నిజ్నిక సిల్లెద్ ఇహిజ క్రీస్తుబా మరజ నిజ్ఎతాన్.

14 క్రీస్తు సాతి వరిబాణిజ్ మరజ నిజ్ఎతాన్ ఇహిజ మాపు సాటిసిని సువార్త పణిదిజ్ రెఇక. మీరు దేవుణుదిజ్ నమ్మిత్తికబా పణిదిజ్ రెఇక.

15 అక్కాదె ఆవిండ, మాపు దేవుణు వందిజ్ అబద్దం వెహ్సినాసిరి ఇజి తోరె ఆజినాద్. ఎందనిజ్ ఇహిజ దేవుణు సాతి వరిబాణిజ్ క్రీస్తుజ్ నిక్త మనాన్ ఇజి మాపు దేవుణు వందిజ్ సాసి వెహ్తా మనాప్. సాతికార్ మర్ది నిజె ఆవెర్ ఇహిజ, దేవుణు క్రీస్తుజ్బా నిజ్ఎతాన్.

16 దేవుణు సాతి వరిజ్ మర్ది బత్కిన్ఎన్ ఇహిజ అయాలెకెండెనె దేవుణు క్రీస్తుజ్బా మరజ బత్కిన్ఎతాన్.

17 క్రీస్తు మర్ది నిజె ఆవెతాన్ ఇహిజ మీరు నమకం ఇడేతిక పణిదిజ్ రెఇక. మీరు ఏలుబా మీ పాపమక వందిజ్ దేవుణు సీని సిక్సదిజ్ తగ్గికిదెరె.

18 అక్కాదె ఆవిండ క్రీస్తుజ్ నమ్మిజి సాతికార్బా నాసనం ఆత సాహార్.

19 యా బత్కుదునె వాండ్రు మజి సాయం కినాన్, సాతిసాహి వెనుక సిల్లెద్ ఇజినె మాటు క్రీస్తు మున్కు ఆనదాన్ ఎద్రు సుడేజి మంజినికాట్ ఇహిజ, మా బత్కు విజెరిజ్ ఇంక హినమాతి బత్కు బత్కిజినాట్.

20 గాని, సాతి వరిబాణిజ్ తొలిత పండితి పంట లెకెండ, క్రీస్తు నిజమె సాతి వరిబాణిజ్ మర్ది నిజిత మనాన్.

21 ఇనిక ఇహిజ ఒరెన్ లోకు వెటనె సాపు వాతాద్. అయాలెకెండెనె సాతి వరిబాణిజ్ మర్ది నిజె ఆనికబా ఒరెన్ వన్ని వెటనె వాతాద్.

22 అదము వెట విజెరె ఎలాగ సాజినారొ, అయాలెకెండెనె క్రీస్తు వెట విజెరె పాణం మనికార్ ఆనారలె.

23 గాని ఒరెన్ ఒరెన్ వన్ని వర్సాదునె పాణం మనికాన్ ఆనాన్. తొలిత పండితి పంట క్రీస్తు. వెనుక క్రీస్తు వానివలె వన్నిజ్ సెందితికార్ పాణం మనికార్ ఆనార్.

24 దని వెనుక వాండ్రు యా లోకమ్దు మని విజు సెజ సత్తుజ్ని, విజు అతికారమ్కాజ్, విజు సత్తుజ మాయిప్పి పొక్కి, వన్ని బుబ్బాతి దేవుణు ఏలుబడిః కిని వందిజ్ విజు ఒపజెప్పాన్లె. నస్తీవలె విజు దన్నిజ్ ఆక్కర్ ఆనాద్లె.

25 ఎందనిజ్ ఇహిజ వన్నిజ్ పగాతి విజెరిజ్, వన్ని పాదమ్కు అడిఃగి దేవుణు ఇడఃనిదాక క్రీస్తు ఏలుబడిః కిజి మండ్రెజ్ వలె.

26 లోకురిజ్ విజెరిజ్ పగాతి సాపుదిజ్, కడఃవేరిదు వాండ్రు నాసనం కినాన్లె.

27 దేవుణు, “విజు వనకాజ్ వన్ని పాదమ్కు అడ్డి ఇట్టాన్”, ఇజి దేవుణు మాటదు రాస్త మనాద్. “విజు వన్కాజ్”, క్రీస్తు పాదమ్కు అడిఃగి ఇట్టా మనాన్ ఇజి వెప్పి వలె, విజు వనకాజ్ విని పాదమ్కు అడిఃగి ఇడ్డి మనికాన్ ఆతి దేవుణు అయ విజు వనకాజ్ వెట వన్నిజ్ వాండ్రె క్రీస్తు పాదమ్కు అడిఃగి ఇడః ఆఎన్ ఇజి టేట తోరిజనాద్.

28 వాండ్రు యా లెకెండ కిత్తి వెనుక, మరిన్ విజు వనకాజ్ వన్ని పాదమ్కు అడిఃగి ఇట్టి మనికాన్ ఆతి దేవుణుదిజ్, వన్నిజ్ వాండ్రె అణజీజి మంజినాన్లె. ఎందనిజ్ ఇహిజ దేవుణు ఒరెండ్రె అయ విజు వన్కాజ్ మున్సు అతికారం మనికాన్ ఆదెజ్వలె.

29 సాతికార్ మర్రి నిజ్నిక సిల్లెద్ ఇహిజ, సెగొండార్ కిని లెకెండ సాతి వరి వందిజ్ బాప్తినం లాగె ఆని దనిజ్ ఇని అర్దం మనాద్? సాతికార్ నిజె ఆఎర్ ఇహిజ ఎందనిజ్ లోకుర్ వరి వందిజ్ బాప్తినం లాగె ఆదెజ్?

30 మరి సాతికార్ మర్రి నీజ్నార్ ఇజి మాపు నమ్మిఎమ్ ఇహిజ ఎందనిజ్ సాపు తప్పిన్ని ప్రమాదమ్కాజ్ మాపు గురి ఆదెజ్.

31 తంబెరిజాండె, ప్రబు ఆతి క్రీస్తు యేసుక్రీస్తు వెట మీరు కూడిఃతి వందిజ్ నాను నిజం ఎసా సర్ద అజినానో అయాలెకెండన్ ఎస్తీవలెబా నాను సపె ఆదెజ్బా అక్కు మనద్ ఇజి నాను మిజి నిజం వెప్పిన.

32 యా లోకమేదిజ్ సెందితి సజతిజ్ వందిజ్ నె నాను ఎపెసి పట్టుమ్దు అడిఃవి జంతుజ వెట విద్దె కితానా? సాతికార్ మర్తి నిజె ఆవర్ ఇహిజ నజి ఇని లాబం మనాద్? సాతికార్ మర్తి నీజ్ ఎర్ ఇహిజ, “విగెహిజ్ సానాట్, అందెజె ఉణాట్ తినాట్”, ఇజి ఆఇకార్ వెహ్హిలెకెండెనె మాటుబా కిదెజ్ వలె.

33 మీరు మొసెం కిబె ఆజి తపు సరిదు సొన్మాట్. “సెఇ వరివెట కూడఃజి మనిజ్, నెగ్గి అలవాటుజ్ మనికార్ బా పాడః ఆజినార్”.

34 నెగ్గి బుద్ది మనికిదెర్ లెకెండె మీరు మహ్సి సొన్సి పాపం కిఎండె నీతినిజాయ్ దాన్ మండ్రు. ఎందనిజ్ ఇహిజ మీ లొఇ సెగెండార్ దేవుణు వందిజ్ నెన్ ఎర్. మిజి సిగు కిదెజ్ ఇజినె ఇక్క నాను వెహ్హిన.

### సాతికార్ మర్తి నీజ్ నివలె మంజిని ఒడొల్

35 సెగెండార్ యా లెకెండె వెన్ బానార్ లెసు, “సాతికార్ ఎలాగ మర్తి నికె ఆనార్? ఎలాగ మర్తి ఒడొల్ దాన్ వారు వానార్?”.

36 బుద్ది సిలికిదెరా మీరు విత్తు విత్తివలె, అయ విత్తి విత్తు నబితిజానె దని బాణిజ్ మొక నేర్జినాద్.

37 నీను వితిక కూలిజ్ గాని, మరి ఎమేణి విత్తుబగాని వహి విత్తునె విత్తిని. విత్తిక వితునె గాని నేర్జిని మొక్క ఒడొల్ ఆవద్ గదె.

38 గాని దేవుణు వాండ్రు నిర్ణెం కిత్తి లెకెండె దనిజ్ ఉండ్రీ ఒడొల్ సిజినాన్. విత్తిమన్ని విజు రకమేది విత్తుజ వనక వనక ఒడొల్ సిజినాన్.

39 కంట విజు ఉండ్రె ననిక ఆవద్. లోకు కంట ఉండ్రీ రకం మనాద్. జంతు కంట మరి ఉండ్రీ రకం, పొటి కంట మరి ఉండ్రీ రకం, మొయ కంట ఉండ్రీ రకం.

40 అయాలెకెండెనె ఆగాసమేది వనకాజ్ ని, బూమిదు మని వన్మాజ్ తేడ మంజినాద్, ఉండ్రె ననికెజ్ ఆఉ. విజు అంతం మనికెజ్ గాని వనక అంతం ఉండ్రె లెకెండె మన్ ఏద్.

41 ఎలాగ ఇహిజ, పొద్దుది అందం ఉండ్రీ రకం, నెలాది అందం మరి ఉండ్రీ రకం, సుక్కెజ అందం మరి ఉండ్రీ రకం. ఉండ్రీ సుక్కాది అందం మరి ఉండ్రీ సుక్కాది అందమేదిజ్ తేడ మనాద్.

42 అందెజె సాతికార్ మర్జి నిజె ఆనివలె అయాలెకెండెనె మంజినాద్. బూమిదు మూసె ఆతి మని పీనుగు సబ్జి సొనిక. గాని సబ్జి సొన్ ఇ ఉండ్రె ఒడొల్దాన్ వారు నికె ఆనార్లె.

43 మూసె ఆతి పీనుగు సుడెదెజ్ బాగ సిల్లిక. సత్తు సిల్లిక. గాని నికె ఆజిని ఒడొల్ అంతమ్ని సత్తు మంజినిక ఆనాద్.

44 మూసె ఆజిని పీనుగు యా లోకమ్దు బత్కిదెజ్ నె తగ్నాద్. గాని నికె ఆజిని ఒడొల్ దేవుణు మంజిని బాడిడు బత్కిదెజ్ తగ్గిక. యా లోకమ్దు బత్కిదెజ్ తగ్గి ఉండ్రె ఒడొల్ మనాద్ ఇహొజ దేవుణు మంజిని బాడిడు బత్కిదెజ్ తగ్గి ఉండ్రె ఒడొల్బా మంజినాద్.

45 అందెజె, “తొలిత లోకు ఆతి ఆదము బత్కిజిని జీవు ఆతాద్”, ఇజి దేవుణు మాటదు రాస్త మనాద్. కడెవేరి ఆదము ఆతి క్రీస్తు పాణం సీజిని ఆత్తు ఆతాన్.

46 పరలోకమ్దు బత్కిదెజ్ తగితి ఒడొల్ ముజాల రెవెతాద్. యా లోకమ్దు బత్కిదెజ్ తగితి ఒడొల్ నె ముజాల వాతాద్. వెనుక పరలోకమ్దు బత్కిదెజ్ తగితి ఒడొల్ వానాద్.

47 తొలిత ఆదాము యా బూమి దూలిదాన్ తయార్ ఆతి మనాన్. వెనుకాహి ఆదాము ఆతి క్రీస్తు దేవుణు మంజిని బాడిదాన్ వాతాన్.

48 బూమిది దూలిదాన్ తయార్ ఆతి వన్ని బాణిజ్ పుట్టి మాటు వన్ని లెకెండెనె మంజినాట్. దేవుణు మంజిని బాడిదాన్ వాతి వన్ని వెట కూడితికార్ దేవుణు మంజిని బాడిడు బత్కిదెజ్ తగ్గికార్ ఆనార్లె.

49 ఏలు మాటు ఎలాగ బూమిదాన్ తయార్ ఆతి వన్ని మూర్తి లెకెండె మనాట్, అయా లెకెండెనె దేవుణు మంజిని బాడిదాన్ వాతి వన్ని క్రీస్తు మూర్తి లెకెండె తయార్ ఆనాట్లె.

50 తంబెరిజాండె, కండాని నలదాన్ తయార్ ఆతిమని యా ఒడొల్దాన్ మాటు దేవుణు కిజిని ఏలుబడిడు సొన్సి మండ్రెజ్ అట్ఎట్ ఇజి నాను మిజీ కసితం వెహ్సాన్. ఎందనిజ్ ఇహొజ సావు మని యా ఒడొల్కు సావు మన్ ఇ బాడిడు మండ్రెజ్ అట్ఎద్. అక్కెజ్ కొత్తాకెజ్ కిబె ఆదెజ్ వలె.

51 గిబ్బిజ్ ఒడోజి విండ్రు, నాను దేవుణుది డాజితి మని ఉండ్రీ సజతి మిజి తెలియ కిజిన. మాటు విజెటె సాఎట్. మాటు విజెటె మార్నాట్.

52 సణెమ్దు, అహిజ ఉండ్రీ కణక రెప డెయ్జి పెర్ని ముజాలె, కడెవెరిది పెరి జోడుబంగ పలక్తిజ సరి అక్క జర్గినాద్. జోడు బాంగ పలక్తివలె సాతికార్ సావు మన్జ ఒడోల్దాన్ నికె ఆనార్. ఏలుదాక బత్కిజిని మాపు కొత్తాజ్ కిబె ఆతి ఒడోల్దాన్ మార్నాట్లె.

53 సబ్జి సొన్నిని మా యా ఒడోలుజు ఎసెజ్బా సబ్జి సొన్జ ఒడోలుజ్ లెకెండ్ మార్నెలె. నిజమె, సావు వాజిని యా మా ఒడోలుజ్, సావు సిలి ఒడోలుజ్ లెకెండ్ కొత్తాజ్ మార్నెలె.

54 సబ్జి సొని మా ఒడోలుజ్, ఎసెజ్బా సబ్జి సొన్జ ఒడోలుజ్ లెకెండ్ మార్నెజ్ వలె. సావు వాజిని మా యా ఒడోలుజ్, సావు సిల్లి ఒడోల్ లెకెండ్ మార్నెజ్వలె. నస్తివలె దేవుణు మాటదు రాస్తి యా మాటెజ్ నిజం అనాద్, “సావు ముస్కు పూర్తి గెలిస్తి వందిజ్, సావు మరి మన్ఎద్. సావు డిజె ఆతి లెకెండ్ వీజితాద్”.

55 “సావు మా ముస్కు మరి గెలిస్తిజ్ అట్నాబా? మజి గుత్తెజ్ ఇజి సావుదిజ్ మరి సాప్పు మనాదా?”, ఇజి దిన్ని వందిజ్ దేవుణు మాటదు రాస్తి మనిక, నస్తివలె పూర్తి ఆనాద్.

56 సావు తపిసిని సాంపు పాపం. మాటు దేవుణు రూలుజు లోజిఎండ మంజినిక, మజి ఓడిస్సెజ్ పాపమ్దిజ్ సత్తు ఆజినాద్.

57 మా ప్రబువాతి యేసుక్రీస్తుదాన్ మజి పాపమ్దిజ్ని సావు ముస్కు గెల్పిస్తి మన్ని దేవుణుదిజ్ వందనమ్కు.

58 అందెజె, నాను ప్రేమిసిని తంబెరిజాండె, ఇనికబా మిజి కధ్లిన్ఎండ గటిజు నిల్పి మండ్రు. ఎస్తివలెబా దేవుణు వందిజ్ కస్టబాడోజి పణి కిదు. ఎందనిజ్ ఇహిజ ప్రబు వేట కూడోజి మీరు కస్టబాడోజి కిజిని పణిజ్, ఎసెజ్బా పణిదిజ్ రెఎండోజి మన్ఉ ఇజి నెసి ఎస్తివలెబా పణి కిజి మండ్రు.

నమ్మిత్తి వరి వందిజ్ డబ్బు కుడుఃప్పిని వందిజ్ వెప్పినిక.

1 దేవుణుదిజ్ నమ్మిత్తి వరి వందిజ్ డబ్బు కుడుఃప్పిని వందిజ్ ఇహిజ నాను గలాతియదు మని దేవుణు సజమ్కాజ్ వెప్తి మని లెకెండ్ మీరుబా కిదు.

2 నాను వానివలె, అయావలెనె కుడుఃప్పెజ్ తొండ, విజు ఆదివారమ్కాజ్ మీ లొఇ ఒరెన్ ఒరెన్ వన్నిజ్ దోహ్కాని దని బాణిజ్ ఉండ్రి వంతు కేట ఇడఃజి వన్నిబాన్ కుడుఃప్పి మండ్రెజ్ వలె.

3 అహిజ నాను వానివలె, మీరు తగ్గికార్ ఇజి ఎయెరిజ్ ఎర్లిసినిదెరొ, వరిజ్ ఉత్రమ్కు రాసి సీజి మీరు కుడుఃప్పిని డబ్బు వరి కీదు యెరూసలెమ్దు పోక్నాట్.

4 నానుబా సొహిజ బాగ మంజినాద్ ఇజి తోరె ఆతిజ వారు నా వెట వానారై.

5 అహిజ ఏలు నాను మాసిదోనియాదు సొన్ని అబ్బె మని దేవుణుదిజ్ నమ్మిత్తి వరిజ్ నెస్పిసి మండ్రెజ్ ఇజి ఒడిఃబిజిన. మాసిదోనియాదు సొహి వెనుక నాను మీ డగ్రు వాన.

6 నస్తివలె మీ డగ్రు సెగం రోస్సు, మండ్రెజ్ ఆనాద్ ఇజి, సిల్లిజ పణి కాలం విజు మీ బానె గడఃప్పా. ఎండనిజ్ ఇహిజ, అయావలె నాను ఎమేణి దరిజ్ సొండ్రెజ్నొ, అయా పయనమ్దు నజి సాయం కిదెజ్ మీరు అట్టిదెర్.

7 ఏలు పయనమ్దు మీ డగ్రు వాజి మిజి దనూల్ ఆజి సొండ్రెజ్ నజి ఇస్టం సిల్లెద్. ప్రబుజ్ ఇస్టం ఇహిజ మీ డగ్రు సెగం కాలం మండ్రెజ్ ఇజి ఆస ఆజిన.

8 గాని పెంతుకొస్తు\* పండోయ్దాక ఇబ్బె ఎపెసి పట్టుమ్దునె నాను మంజినలె.

9 ఎండనిజ్ ఇహిజ, ఇబ్బె నెగెండ సువార్త పణి జర్గిని లెకెండ్, తగ్గి నెగ్గి అవ్కాసం నజి దోహ్క మనాద్. నజి ఎద్రిసినికార్బా మనార్.

\* **16:8 16:8** పడాయి ప్రమాణమ్దు ఇక్క వారమ్క పండోయ్, మరి పంట కొయ్య పండోయ్ ఇజి వెవె ఆజినాద్. (నిర్లమ 34:22, 23:16) వెజెరె వెట కూడఃజి యా పండోయ్ కిదెజ్ ఇజి ఇస్రాయేలు లోకర్ యెరుసలెమ్దు మంద వాజి మహార్. పెంతెకొస్తు ఇహిజ యాబయ్ ఇజి అర్లం. యాక పస్సు పండోయ్ ఆతి వెనుక యాబయ్ రోస్సు ఆనివలె ఆజినాద్.



10 తిమోతి మీ డగ్రు వాతిజ, ఇని దనిజ్బా తియెల్ అవండ మీ వెట మంజిని లెకెండ వన్నిజ్ సుడేజి మండ్రు. ఎందనిజ్ ఇహిజ, నాను కిజిని లెకెండనె వాండ్రుబా ప్రబు పణి కిజినాన్.

11 ఎయెన్బా వన్నిజ్ ఇజిరి కణక సుడేదెజ్ ఆఎద్. వాండ్రు మర్రి నా డగ్రు వాదెజ్ వన్ని మన్నుదు సార్లిదాన్ వన్నిజ్ పొక్తు. మహి తంబెరిజ వెట వాండ్రు వానానై ఇజి నాను ఎద్రు సుడేజిన.

12 ఏలు తంబెరి ఆతి అపొలో వందిజ్ వెప్పిక ఇమిక ఇహిజ, మహి తంబెరిజ వెట మీ డగ్రు సొండ్రెజ్ ఇజి నాను వన్నిజ్ బతిమాలిత గాని ఏలు వాదెజ్ వన్నిజ్ ఇస్టం సిల్లెతాద్. గాని మరి ఎసెజ్బా వాండ్రు అవ్కాసం దోహక్కివలె మీ డగ్రు వానానై.

13 మీరు జాగర్త మండ్రు. దేవుణు మున్ను మని నమకమ్దు గటిజ మండ్రు. దయ్ రమ్దాన్ మండ్రు. సత్తుదాన్ మండ్రు.

14 మీరు కిజిని పణిజ్ విజు ప్రేమదాన్ కిదు.

15-16 అక్కాయ ప్రాంతమ్దు తొలిత దేవుణుదిజ్ నమ్మిత్తికార్ సైపాను ఇండ్రోణికార్ ఇజి మీరు నెస్సిదెర్ గదె? దేవుణుదిజ్ నమ్మిత్తి వరి వందిజ్ పణి సాయం కిదెజ్ వరిజ్ వారి ఒపజెపె ఆత మనార్ ఇజిబా మీరు నెసినిదెర్. అందెజె తంబెరిజాండె, మీరు నిని వరిజ్ అణిజిజి మండ్రు. అక్కాదె ఆవండ పణిదిజ్ కూడేజి వాని వరిజ్ ని క్షబాడేజి పణి కిజిని వరిజ్ బా అణిజిజి మండ్రెజ్ ఇజి నాను మిజి బతిమాల్లిన.

17 మీరు వాదెజ్ అట్ అండ మహిజ్ బా, సైపానుని పొర్మానాతు, అక్కాయికు ఇనికార్ వాతివలె నాను సర్ల ఆత. ఎందనిజ్ ఇహిజ, మీ బాన్ నజి సిదెజ్ సిల్లితికెజ్ మీరు నజి సితార్.

18 నా మన్నుదిజ్, మీ మన్నుదిజ్ వారు సర్ల కిత్తార్. ననికార్ గవ్ రమ్దిజ్ తగ్గికార్.

19 ఆసియాదు మన్ని సజమ్ కాణికార్ మీరు నెగెండ మనిదెరా ఇజి వెన్ బాజినర్. అక్కుల, ప్రిస్కిల ఇనకార్ ని వరి ఇండ్రో కూడేజి వాజిని నమ్మిత్తి వరి సజమ్ బా ప్రబు పేరుదాన్ మీరు నెగెండ మనిదెరా ఇజి వెన్ బాజినార్.

20 నమ్మిత్తి తంబెరిజ్ విజెరె మీరు నెగెండ్ మనిదెరా ఇజినార్. దేవుణు వెట కూడితి మన్ని వరిజ్ మీ ప్రేమ తోరిస్తు. నెగ్గి మన్నుదాన్ ఒరెన్ మరి ఒరెన్ వన్నిజ్ పొంబిజి వందనమ్కు వెచ్చు.

21 పవులు ఇని నాసు నా కియుదానె యా వందనమ్కు రాసిన.

22 ఎయెన్బా ప్రబుజ్ ప్రేమిన్ఎండ మహిజు సయిప్ వన్ని ముస్కు. రపిద్. యేసు ప్రబు వాజినాన్. రఅ ప్రబువా.

23 ప్రబువాతి యేసుక్రీస్తు దయదర్మం మిజి తోడుః ఆజి మనీద్.

24 క్రీస్తుయేసు వెట కూడితి మన్ని మీరు విజిదెరె వెట నా ప్రేమ మనీద్. ఆమెన్.

**Konda: కొండ బాసడు నెగ్గి కబ్బు**  
**Konda Dora New Testament which was published in**  
**2006**

copyright © 2006 Wycliffe Bible Translators, Inc.

Language: Konda-Dora

Contributor: SIL International (in Asia)

All rights reserved.

2025-05-06

---

PDF generated using Haiola and XeLaTeX on 6 May 2025 from source files  
dated 7 May 2025

840896da-3a66-5e43-9018-4a95a349d60c